

烈祖成績

一二

137
10
125

007073-001-5

137-125

烈祖成績

安積 澹泊/著

和1冊

M11

ACK-0875



137
20
125

東 京 圖 書 館

二〇 冊	三九 號	八 架	三 函	史 類	和 書 門

責 安積覺編次

卷 一

澹泊安積先生著 鶴鳴館藏版



烈祖成績 全三十卷

明治十年東京內國
勸業博覽會出品書

東京剗刷五氏刊行



烈祖成績序

神祖龍興於參遠。平叛亂。掃妖氛。救生民於塗炭。以建磐石之基。文德武功。播于輿誦。布于方策。如當時諸記所載。各傳其所見聞。莫非皆記實事。而所見有異。所聞不同。其間不能無詳略差誤。神祖之時。距今僅百年。而諸說紛紛。無所統一。豈不重可惜乎。我成公勵精圖治。欽仰祖宗風烈。臨政之暇。使侍臣讀近世諸記。至神祖之事。最深致意。府僚安積覺字子先者。耆宿博洽。最熟近世軍記。公命彙纂神祖事業。勒成一書。子先遂參覈群籍。閱數年而脫稿。凡二十卷。起筆之初。錄一卷。取進止體裁稱旨。賜名烈祖成績。其爲書也。起於天

文。迄乎元和。凡神祖謀議舉動。神智妙筭。一繫年月。祭然有叙。諸記所載。參互考索。稗編叢書。究搜弗遺。刊浮華。補闕略。差者訂之。誤者辨之。至有所關係。則間加論述。考據精確。引證詳明。於是乎嚮者紛紛者。有所統一。而神祖盛德偉略。歷歷可覩矣。實足爲一代實錄也。嗚呼。公所以使纂是書者。欲見遺範。取則于此。其勵精圖治之意。固不待言而知焉。而子先克奉其旨。成纂述之功者。其將順翊贊之實。亦有不可掩者。蓋成公之志。君人之德也。子先之勉。奉上之誠也。君臣道合。有此盛舉。豈不韙哉。今茲繕寫新就。廣奉命述書之所以成。以爲之序。

享保十七年壬子臘月之吉

水戶府大井廣謹書

烈祖成績序

春秋之義尊王爲大國朝自神武天皇定鼎橿原宮。列
聖相承。代天工而理萬幾。律令格式之設。刑賞黜陟之典。臚
列無遺。庶績咸熙。天叙天秩。粲然不亂。迨乎中葉。皇綱紐解。
威權下移。遂使陪臣執國命。視君如弁髦。足利氏雖開霸府。
於京師。而逼於權臣。仰其哺乳。身且不能庇焉。能得尊王。不
唯不能尊。又從而侵軼之。鍾簋不設。鹵簿久廢。公卿星散。妃
嬪萍轉。幾乎黍離麥秀之歎。而亂臣賊子接踵相望。應仁以
來。板蕩極矣。右大臣織田公。關白豐臣公。雖粗知尊王。而非
出於誠心。反營其私。皆無足觀也。神祖英武間出。謀略如神。

戡定四方之亂。拯億兆於焚溺。真勇彰於大高之城守。大義伸於長湫之野戰。馬上購書。興隆儒學。及天下大定。首使諸侯服王事。營繕禁闕。修築宮垣。奉膏腴以豐祭祀。起廢典以復舊規。優廩祿於公卿。頒湯沐于妃嬪。四海無烽燧之警。而黎元奠枕泰山之安。又與關白藤原公議定法制。綱舉目張。朝廷肅穆。遂爲永世不易之重典。尊王之舉。不亦大乎。先君成公命臣覺編次神祖事迹。顧惟神祖度量之闊。信義之篤。仁以立基。智以馭衆。延攬英雄。能成一統之業。臣之庸虛。謏劣。豈能得應其選哉。然君命至重。不得辭避。退而蒐索近世諸書。譯以綴之。而載籍不備。率多闕略。野錄叢說。真僞

相半。折衷異同。摭摭遺落。一從本書所有。而不敢一毫緣飾。故其文質而俚。朴而陋。務使核實。以備史臣之采擇耳。至於君臣父子。彛倫攸叙。將帥偏裨。安危所繫。則間附己意。以提撕之。亦欲觀者注意也。嚮者試撰一卷。以取進止。公覽之曰。可。賜名曰烈祖成績。太甲曰。視乃烈祖。無時豫怠。君牙曰。惟乃祖乃父。世篤忠貞。服勞王家。厥有成績。紀于太常。其義蓋取諸此也。亡何公薨。悲哽嗚咽。幾至廢卷。而欲獻之嗣君。以遂公之志。臣殘喘無幾。唯恐日暮入地。故兼程課功。夜以繼晝。凡五閱寒暑而成。釐正爲二十卷。繕寫進呈。僭越之罪。旣無所遁。而踈繆之責。深畏貽譏。矧夫神祖基業之大。雖不可

翮縷而文教武德發號施令一以仁爲本故惠澤被乎八荒福祚流于萬世臣之瑣微豈敢管窺蠡測而闡揚盛業哉唯繹尊王之義以弁卷首耳尊王所以開太平之基而義公肅公之訓誨蒙士也臣亦竊與聞焉

享保十七年歲次壬子臘月穀日

臣安積覺拜手稽首謹叙

烈祖成績凡例

一參河基業盛于道甫公而遭變中衰道幹公有恢復之功故述二公之事見其梗槩至天文二十年方揭年號以專繫神祖之事迹

一每事標其出處遇有異同則參覈諸書擇其可者書之而注其異於下誤者訂之複者刪之無所可否者併存以備考索

一凡名諱不可以公稱然俗間不知諱之以呼名稱公爲美如信長公秀吉公是也不如是無以見其實今一從本書一凡將士有系譜可考者略書其父祖以見家世有更姓名

稱號者注于其下。

一凡叙任諸書有明文者皆繫年月書之。蓋喪亂之世王室不振。群雄僭稱官爵。至於陪臣亦然。即如神祖永祿九年始叙從五位下。任參河守。九年以前群臣安得有官爵哉。如本多忠勝任中務大輔。榊原康政任式部大輔。在天正十四年。皆諸書所追書也。列國群臣濫冒無可疑者。刑之。真偽不可辨者。一從本書所有書之。

一凡將士稱號官名。書於初出。而下皆省之。及卒。備書稱號及官。以見其始終。然將士浩繁。恐有失於點檢。稱號疊出者。又有同時同姓名者。松平家忠三人。甚太郎主殿頭紀

伊守也。松平康親二人。筑後守周防守也。酒井忠勝二人。宮內大輔讚岐守也。不繫稱號官名。則混殺難辨。故備書別之。

一凡官爵繫姓名上。定式也。如慶長十年叙任。書侍從下野守忠吉。上總介忠輝是也。如井伊直政直孝父子書井伊侍從。吉良義彌書吉良侍從。非正式也。然當時所稱。不得輒改。皆從本書。

一戰鬪事實。有出於傳聞者。有出於愛憎者。記者不一。傳會忖度。往往失真。如魏吳合肥赤壁之攻戰。孫盛有異同評。盛與魏武相去纔七十餘年。載籍粗備。而乖謬如此。況今

距神祖之世百二十年。是非貿亂。叢脞重沓。雖加釐正。未免爽誤。後之君子庶鑒裁之。

烈祖成績目錄

卷之一

起天文二十年
終永祿五年

卷之二

起永祿六年
終十二年

卷之三

起元龜元年
終天正元年

卷之四

起天正二年
終六年

卷之五

起天正七年
終十年

卷之六

起天正十一年
終十三年

卷之七

起天正十四年
終十八年

卷之八

起天正十九年
終慶長三年

卷之九

起慶長四年
終其年十二月

卷之十

起慶長五年
終其年七月

卷之十一

起慶長五年八月
朔終其月晦

卷之十二

起慶長五年九月
朔終其月晦

卷之十三

起慶長五年十月
朔終其年十二月

卷之十四

起慶長六年
終十年

卷之十五

起慶長十一年
終二十五年

卷之十六

起慶長十六年
終十九年九月

卷之十七

起慶長十九年十月
終其年十一月晦

卷之十八

起慶長十九年十
二月終其月晦

卷之十九

起元和元年
終其年四月

卷之二十

起元和元年五
月終二年四月

烈祖成績引用書目

東照宮年譜

東照宮年譜附尾

東照宮遺訓

創業記

三河物語

三河記

參河後風土記

駿府記

德川記

一本德川記抄

德川歷代

德川家譜

增補追加家忠日記

松榮紀事 即武德大成記

大樹寺記

三遠平均記

東宮記

德川代代記

中興源記

秀康事蹟

三方原合戰記

岡崎物語

源流綜貫

近代諸士傳略

彰考館雜錄

古簡雜纂

南行雜錄

又續南行雜錄

重編應仁記

甲陽軍鑑

甲亂記

淺井軍記

織田家譜

信長記 織田本
見行本

京都將軍譜

信長譜

秀吉譜

太閤記

伊勢國司軍記

朝鮮征伐記

筑紫軍記

關原軍記

慶長記

新慶長記

永井直清本慶長記

關原記

關原外記

慶長一統記

關原合戰誌

石卯餘史

關原記大全

慶元記

奥州軍記

最上義光記

清正記

四家合考

毛利家記

細川系譜

鳥居家傳

安倍家傳

鈴木重好傳

小幡景憲紀事

小幡道牛事歷

小幡景憲傳

藤堂高虎行狀

松平忠明行狀

水野勝成事記

和州諸將軍傳

難波戰記

一本難波戰記

大阪記

大阪事記

大阪軍記

難波記

難波軍記

大阪陣冬夏事記

浪花戰記

若江合戰記

龜田大隅事記

渡邊誰菴事記

小笠原久俊自記

大阪首帳

羅山文集

鷲峰文集

秦湘行記

木曾路記

武家盛衰記

東國大平記

前車後語集

元寬日錄

巖淵夜話

玉滴隱見

老人雜話

勇士一言集

播州青蓮寺記

諸寺過去帳

參州和田妙國寺
播州班鳩寺

諸家傳

小笠原忠真碑文

主圖合結記

諸家文書纂

松平系圖

福釜 大草

櫻井 五井

藤井

增上寺所藏松平譜

寬永系圖

諸家系圖家譜

水野 安倍

足利 阿部

藤堂 杉浦

佐佐木 佐久間

里見 久松

源氏 鈴木

小笠原 大久保

松尾 百尾

小笠原 柳

佐野 稻葉

石川 朝比奈

荒木

津田 植村

南條 真田

伊勢 酒井

菅沼 本多

野中 高力

成瀨 高梨

武田 淺野

奧平 水谷

松田 新莊

北條 保田

菅原 片倉

阪崎 斯波

堀田 戸田

桑山 夏目

和田 南部

小幡 結城

玉蟲 鳥居

大友 遠藤

伊野 伊王野

續日本後記

三代實錄

清和紀

延喜式

園太曆

太平記

公卿補任

武家叙任

倭名類聚抄

拾芥抄

梅花無盡藏

國朝諫諍錄

雍州府志

抱朴子

焦氏易林

懲忿錄

明紀事本末

總計一百二十一部

烈祖成績引用書目終

目、今從家忠日記松榮紀事正親世稱與四郎家次孫清秀子清兼右近忠輔子容貌端麗高祖父

長親公見之悅曰是兒必揚名于天下松榮紀事祖父清康公稱

世良田二郎三郎有將帥之器戡定鄰敵恢廓疆場天文四

年十二月屯於尾張森山安倍大藏少輔定吉子彌七正豐

以猜疑遽起弑公植村新六持益安倍家傳說定吉作正澄今從參州和田妙國寺過

去帳松榮紀事持益作榮安據近代諸士傳畧榮安法名而非名新六名持益今從之植村土岐氏之裔也持益時年十

六立斬正豐殪之將佐還軍岡崎廣忠公幼名仙千代亦稱

二郎三郎時年甫十歲叔父內膳信定長親公第三子信忠公弟奪岡崎

而將不利於公定吉抱公走伊勢神戶流離間關孤立無援

定吉依東條持廣屬今川上總介義元持廣吉良氏之族持清子為東條城主義

元上總介氏親子治部大輔襲稱上總介請納公于岡崎義元諾六年五月朔遂

還岡崎按德川歷代年譜附尾以廣忠公遜于伊勢係天文七年為十三歲時事以還岡崎係十一年今從增補

追加家忠日記松榮紀事

臣按其子弑君而其父居職自若人皆疑焉是不亮其心

而論其迹者也初內膳信定獲罪於清康公織田信秀妻

之兄也信秀因啗以利使圖公信定歛忘君臣之義棄叔

姪之好據上野城以應信秀公欲班師討之時有嫉定吉

之威權者流言與信定通謀定吉懼其無辜受誅蒙叛臣

之名作書誓以質鬼神而靡他授正豐曰吾見殺汝就執

政而上之頃之營中馬逸騷擾正豐躁妄意父見殺遽弑

公及檢正豐之屍。得定吉誓書。諸將白其事於道。閱道忠

二公。清康公祖父長親公。號道閱。父信忠。公號道忠。皆剃髮退隱。居參河。至此猶存。二公知其無

貳宥之。定吉之寃。始獲雪矣。然定吉患其子為逆。欲自殺。

藏人信孝。扼之。既而信定果奪岡崎。定吉艱楚辛勤。百折

不回。抱負嗣君。周流二州。有狐偃趙衰之忠。而不媿申包

胥之義。竟能納嗣君於岡崎。復疆圉於往昔。不以其子為

累。而至其孫正就。受方面之寄。居鈞衡之任。定吉之忠。久

而彌彰矣。

十年。娶參州刈屋城主水野右衛門大夫忠政女。忠政下野守某子。初

稱下野守。明年生神祖。忠政卒。其子下野守信元。據刈屋。緒川二

城。緒川或作小川。國音相通。背今川義元。結好於尾張古渡城主織田

備後守信秀。彈正忠信定子。公以義元之力。得還岡崎。故與信元絕。

離婚。以避嫌疑。參河後風土記曰。夫人以嫉妬見出。按夫人賢明有母儀之德。其說不足取。今從家忠日

記。松榮再娶田原城主戶田彈正少弼康光女。康光彈正左衛門宗光四

世孫。左近政光子。十四年三月。帳下士巖松八彌。酌酒將弑公。傷其

股。公怒。拔刀逐之。八彌出走。植村持益。適登城。與之遇橋上。

相搏。墮塹中。松平藏人信孝。清康公弟。廣忠公叔父。提槍來。謂持益曰。

宜縱八彌。我刺殺之。持益曰。八彌大逆。若縱之。逸去。悔何及。

宜併我刺殺之。信孝猶豫。持益竟殺八彌。斬其首。廣忠公賜

書褒其忠勇。松榮紀事年譜附尾並云。八彌為鄰敵所誘。將弑公。而松榮紀事無年月。但云頃年。德川記德

川歷代係年月而歷代叙事頗詳今從之八彌巖松氏之胃
一目眇故時人或稱片目八彌又按松榮紀事持益作家政
家政持益之子而殺八彌者實持益也時年二十六今訂之
十六年信秀築壘逼岡崎使

其子信廣信長公庶兄據安祥岡崎四面受敵勢甚危急公乞援

於義元義元將發駿河遠江兵救之而徵質於公公不得已

以神祖為質時年六歲從者二十八人陸皆讐國故取舟路

自西郡至田原康光子甚五郎創業記作彈正子孫四郎家忠日記德川記德川歷代並

作五郎兵衛按戶田系圖諸士傳略康光子無孫四郎五郎兵衛而有甚五郎名闕後稱丹波守其妹下注云廣忠卿室

今據之通志信秀奪神祖於潮見阪從兵金田某戰死甚五郎

將神祖至古渡授信秀曰卿欲圖參州無過以此為質信秀

大悅以錢五百貫酬之三河物語松榮紀事曰青銅一千貫創業記曰二百貫德川歷代曰永樂

錢一百貫諸說紛紜家忠日記但云厚賞之按駿府記神祖自言吾幼時有又右衛門某鬻吾錢五百貫後藤少三郎面

聞神祖話如此今從之又右衛門蓋戶田康光家士也幽于熱田加藤圖書家遣使岡

崎曰吾得駿府任子卿畔義元而與吾講和則送還任子不

然殺之廣忠公曰尾張參河構兵多年奸人奪質以為奇貨

非吾志也與義元定約其事甚重豈以一子易信義乎生殺

在卿意非吾所知也信秀聞之怒移神祖於萬松寺天王坊

間禁錮之艱苦萬狀所生水野氏再醮久松佐渡守俊勝初稱

彌九郎肥後守定俊子在尾州阿古居與熱田相近水野氏屢遣俊勝

家士平野久藏竹内久六郎問其寒溫贈衣物而撫慰之義

元聞廣忠公之言感其志益議救之十七年三月信秀率兵

至安祥。義元以臨濟寺僧雪齋。

○據諸家傳、大原崇乎號雪齋、住清見寺、有勇略、曉軍事、

將兵屢有功、或云雪齋義元諸父、義元畏憚之、雪齋死、義元稍懈、軍政日亂、按彰考館雜錄、載義元戒其子氏真書曰、余

以父命、自幼為僧、就禪德寺默堂和尚、而學、歷二十年、雖無所成、而其志所在、大原和尚之所知也、據之、則其說或然也、

將兵數千。朝比奈藤三郎泰能、岡部五郎兵衛長教、為副救

之。松榮紀事、泰能為將、雪齋為軍監、今從家忠、日記德川歷代年譜附尾、泰能後稱備中守、廣忠公與援

軍合。與信廣戰于小豆阪、敗之。酒井正親揮槍突戰。信廣退

奔。援軍追之。信廣之兵津田孫三郎、織田造酒丞等七人還

鬪。眾乘之競進。大敗義元兵。我軍小林源之助、林藤五郎等

戰死。岡部長教橫擊尾張軍。又敗之。信秀使信廣守安祥城

而還。尾張援軍亦還駿河。是歲信秀又率兵七千餘出陣于

西野。岡崎之兵張陣相對。信秀侮其寡。進陣于柳河地。廣忠

公選善射者。雨射。長阪血槍。信政陷陣。以槍衝盾。從者曰。宜

以礮衝之。信政倒其槍鏃之。岡崎之兵乘勢競進。信秀兵大

敗。單騎遁歸。松榮紀事、本書曰、信政稱彥九郎、每戰莫不血塗槍、清康公每見其槍、呼曰血槍、遂以為稱、血

槍、茶利國音相通、故其子孫稱茶利九郎、十八年三月三日。織田信秀卒。其子信

長統領其眾。信長公幼名吉法師、後稱上總介、至正二位右大臣、岡崎諸將欲因喪伐

之。會廣忠公罹疾。六日薨。年二十四。創業記三遠平均記作二十五、三河物語二十

三、今從家忠日記、德川記松榮紀事、德川家譜大樹寺記、增上寺所藏松平譜、一說或作二十九、誤、公慈仁撫

士。勇而決機。然性多猜忌。眾不親附。時神祖甫八歲。在熱田。

聞訃哀毀。始如成人。人皆哀感。松榮紀事

臣按岡崎之基業。厥來遠矣。蓋根本固則枝葉茂。淵源深則派流廣。親氏公以世室之胄。親氏公有韜光晦迹。流寓

參河。仁恕寬厚。邦人懷其惠。竟賴其力。得有土地。人民泰

親公亦仁恕。有武幹。泰親公親氏公子克撫衆庶。開拓疆圉。築巖

津岡崎二城而居岡崎。雜錄駿參紀聞曰岡崎城寶德元年大草西海所始築也舊稱龍城

蓋泰親公修築而更稱岡崎也使信光公居巖津。信光公泰親公第二子信光公智

勇兼備。寬猛相濟。兼弱攻昧。基業始大。天之所佑。子孫蕃

衍。所生男女四十八人。別子支庶。割郡分邑。宗族蔚乎日

盛矣。親忠公。信光公第三子謀畫周摯。勵精圖治。能守信光公之

教。恒以撫衆為務。善人為寶。絕甘分少。威惠並行。長親公

親忠公子沈毅有權略。弗墜堂構。以安祥之寡兵。破今川氏親

之多衆。鄰敵讐服。威名大振。皆由寬簡。馭衆德澤廣覃也。

唯信忠公。長親公子日夜酣飲。不恤軍政。舉動不厭衆望。宗族

不親。勲舊猜懼。幸而長親公猶存。將佐稟命。使營蒐裘於

大濱。清康公。信忠公子天資絕倫。勇略蓋世。士心歸嚮。大振先

業。其勢將攘斥尾濃之疆敵。直進京師。謁見將軍義晴公。

一旦變起倉猝。我師燿焉。廣忠公。清康公子幼弱。危如綴旒。叔

祖信定竊蓄異圖。安倍定吉抱公出奔。乞援于今川義元。

通謀于岡崎諸將。大久保忠俊八國府甚六大原左近衛

門等。忠誠貫金石。義氣動天地。內外合謀。納公於岡崎。公

曉暢軍事。部伍整肅。克繼先志。我武維揚。不幸而蚤世。神祖幼為質。中路而被奪。拘幽熱田。伶行單棊。百艱備嘗。諸將協謀。僅得還城。不浹辰而又如駿河。義元代而為政。以參河為己有。將士懼其褫采邑。躬執耒耜服田畝。而無敢生離叛之心。每有勅敵。義元徵發參河之兵。以為前鋒。將士知其餌敵。而不敢辭避。控弦抗戈。肝腦塗地。而不悔者。皆欲我君速歸岡崎。而紹祖先之墜緒也。小白之入齊。重耳之還晉。未足為喻。苟非歷世仁漸義摩。淪肌浹髓。則烏能至此哉。天棐其忱。竟得復舊。長而英武。蓋世寬仁。大度。擲風沐雨。經略殆無虛歲。青野原之師。大憇就戮。難波之

戰。一舉大捷。將士歸心。天下景從。既而偃武宗文。四海寧謐。上尊天子。下撫衆庶。遂開萬世之基業。而勲舊之裔。世祿匹休。豈非積德累仁之效哉。故臣竊推其根本。究其淵源。以為岡崎之基址。殆與周室相類。周自太王以來。世修仁德。以立邦基。岡崎之於岐豳。其殆庶幾乎。詩曰。文王孫子。本支百世。凡周之士。不顯亦世。此之謂矣。

岡崎群臣。計議國事。石川與七郎數正。

安藝守清兼孫。左近大夫廣正子。後稱伯

者本多肥後守忠真。

平八郎忠豐次子。忠高弟

天野甚右衛門繁昌等謂。

繁昌三郎兵衛康景弟。父祖注下

不如與尾州講和。蚤迎竹千代君入岡崎。

石川清兼酒井正親謂。今川義元與先君輯睦。且遠參甲兵。

幾數萬騎。其勢彊大。不如屬義元。以圖還入。植村持益松榮

作出羽守家政。據諸士傳略。家政天文十年生。此時僅九歲。持益天文二十一年戰死於沓懸。其為持益明矣。故今訂之。

鳥居伊賀守忠吉謂忠吉源七郎忠明子與尾州講和。雖事可速成。而

義元以三州之兵伐我。則勢不可當。議未決。義元聞訃曰。信

長將岡崎之質來攻。則將士望風降附。參州皆為敵有。此大

患也。可速為備。則使朝比奈泰能岡部長教等率兵守岡崎。

舉國屬義元。諸將議曰。安祥密通岡崎。不如攻而拔之。十九

日發兵攻安祥。信廣堅守防戰。本多平八郎忠高平八郎忠豐長子

前島傳二郎中矢死。榊原藤兵衛戰死。我兵無利而退。乃告

駿府。義元重發駿遠二州之兵。以僧雪齋朝比奈泰能松井

某等為將。期以仲冬至岡寄。信長聞義元出兵。慮安祥兵寡

難守。遣兵援之。雪齋謀曰。設伏邀援兵。則城兵當出救。我以

多兵夾擊。破之必矣。十一月八日。尾州援兵將入安祥。伏兵

遽起邀擊。城兵出救之。駿河軍三面夾擊。岡崎精兵松平玄

蕃頭清善與二郎親善子。初襲稱。與二郎世稱竹谷家。松平主殿助伊忠大炊助好景子。

世稱深溝家。松平勘四郎信一信光公曾孫。彦四郎利長子。松平

右京松榮紀事。據福釜松平系圖。蓋三郎二郎親次也。稱右京亮。本多彦二郎廣孝彦三郎信

重子。後為豐後守。更越前守。小栗助兵衛。酒井左衛門尉忠次左衛門某子。幼名小

平次。更小五郎。石川清兼。石川彦二郎。村越平三郎。村越二

郎八。米津藤藏。本橋金五郎。天野繁昌。鳥居忠吉。大久保五

郎右衛門忠勝等。忠勝初稱新八郎父祖注下五十三人。揮槍奮擊。衆軍

競進。信廣素驍勇。先衆力戰。而寡不能敵衆。外郭遂破。信廣

窮蹙。纔保牙城。信長聞告。急馳救之。至鳴海。見狼煙起。疑城

陷。按轡不進。雪齋遣使謂信長曰。安祥既破。信廣命在旦夕。

若欲生之。當以岡崎之質易之。不然立殺之。信長怒不答。將

佐苦諫。信長從之。雪齋放還信廣。神祖遂得還岡崎。諸將繼

先君之志。送神祖於義元爲質。在岡崎纔十日。又赴駿府。酒

井與四郎重忠。雅樂頭正親子。後稱河內守。天野三郎兵衛康景。縫殿速房孫。甚

右衛門平巖七之助親吉。後稱主計頭。阿部善九郎正次。伊豫守正勝子。

阿部新四郎高力與左衛門清長。備中守重長孫。新三安長子。後稱河內守。內藤

與兵衛村越平三郎。江原孫三郎。古橋宗內。神原平七郎。渥

美太郎兵衛友勝。平巖新八郎。平巖善七郎。本橋金五郎。渡

邊勘解由左衛門。渡邊甚平次。天野又五郎。石川彦二郎。石

川內記。植村新六郎家政。持益子。後及奴僕一百餘人從焉。

創業記。家忠日記。三河物語。德川記。諸士姓名。據松榮紀事。○家忠日記。德川歷代等諸書。皆以按安祥易質子神祖。又

赴駿府。係本年二月。爲廣忠公時事。松榮紀事。叙事甚詳。爲十一月事。年譜。創業記。三遠平均記。亦係十一月。今從之。

義元築館于駿府宮崎。居之。使久嶋土佐守監護。資用菲薄。

庖廚寒儉。鳥居忠吉家素富饒。常自岡崎奉金帛以資之。松

紀事。○雜錄。駿參紀。聞曰。神祖外祖母名萬大。河內左衛門佐元綱女。嫁水野忠正。生傳通院大夫。人爲尼。號玉桂。慈仙

在駿府。少將町。構小庵。居僧智短。神祖幼爲質。在駿府。依慈仙尼。入僧庵。學書。後創爲華陽院。以智短爲開祖。山號玉桂。

寺有神祖所親接甘橘折樹安慈仙尼牌往年先臣大岡崎

宗族老臣皆受義元指麾義元以石川右近安倍定吉為岡

崎城代鳥居忠吉松平二郎右衛門重吉為奉行松榮紀事重吉信光

當待年長還之乃遣吏歛賦稅將士懼失其食邑神祖聞之

遍賜書曰采地一切不異先考之時將士皆安堵家忠日記松榮紀事

天文二十年辛亥神祖在駿河年方十歲往安倍河原觀端

午石戰一群三百餘人一群半之眾皆就多群觀之神祖命

僕就寡群從者怪問之神祖曰多群恃眾其心不一寡群知

寡勦力勵勇多軍必敗果如其言人皆驚異義元聞之喜曰

可謂將門有將愈器重之甲陽軍鑑為神祖十三歲時事今從創業記松榮紀事

二十三年甲寅神祖在駿府是歲始擢甲創業記

弘治元年乙卯神祖在駿府今川義元發駿參二州之兵攻

尾州蟹江城以牽織田信長岡崎之兵松平和泉守真乘為

前鋒真乘小名源次郎稱左近信光公五世孫和泉親乘子世稱大給家松榮紀事作家乘據諸士傳畧家乘真乘

子天正六年生今訂之家忠日記作近乘益誤大久保新八郎忠俊宇都左衛門五郎忠茂子初稱

其弟甚四郎忠員後稱平右衛門姪七郎右衛門忠世忠員長子

阿部四郎五郎忠政大久保彌三郎忠久子為養子杉浦八郎五

郎勝吉德川歷代作鎮貞今從杉浦系譜父子三人先登揮槍力戰世謂之

蟹江七本槍家忠日記松榮紀事○按世稱七本槍者四天文十七年參州小豆阪天正十一年江州志津

列祖成續

卷一

十

嶽慶長五年信州上田與尾州蟹江四也武井角左衛門大橋新三郎戰死家忠日記

松榮紀事

二年丙辰神祖在駿府正月十五日加首服時年十五義元

加冠關口刑部少輔親永理髮年譜德川記德川歷代○一說親永作氏緣松榮紀事作

義廣今從上諸書紀事又云關口或稱瀨名氏親永義元妹夫諸書或作姑夫未知孰是德川歷代曰稱瀨名關口新野

三家曰今川家一族衆據之則瀨名關口別一家也稱德川二郎三郎元信義元議昏

以親永女為夫人禮成參州之士至駿府賀之家忠日記年譜附尾以納

夫人係三年三遠平均記作二年二月十三日今從創業二記德川歷代德川家譜松榮紀事但諸書無月日故不書

月二十日松平右京亮義春初稱甚太郎長親公第四子為東條城主世稱東條家代

神祖率西參河譜第之士攻本州日近城城主奧平久兵衛

貞延拒戰貞延德川歷代作貞置今從福金松平系圖義春中矢而死神祖聞之

揮淚嗟惜聞者皆感動嗣子家忠尚幼稱龜千代家臣松井

左近忠次松井金四郎某子忠而有勇且為姻戚故使忠次傳家忠

領其兵數有軍功年譜創業記家忠日記松榮紀事是歲築福金寨使酒井

忠次守之大久保忠勝渡邊八右衛門義綱源次有綱子清兵衛長綱弟

算助大夫正重清左衛門正治弟三子圖書重忠弟杉浦勝吉大原左近衛門

阿部忠政大久保次右衛門忠佐等忠佐忠員弟二子忠世弟為援兵信

長部將柴田權六勝家信長公家老後為修理亮領越前荒川新八率兵一

千餘騎來攻松榮紀事作二千餘騎未知孰是今從家忠日記城兵力戰渡邊義綱

射殺尾州魁兵早川藤太大久保忠勝將取其首勝家揮槍

縱忠勝阿部忠政射勝家傷之。其兵來救。扶之上馬。忠勝刺

其馬。勝家僅免而退。荒川新八先衆而進。我兵奮擊。斬獲數

十人。新八斂兵還尾州。家忠日記係正月創業記。年譜附尾

歷代松平三郎二郎親俊守福釜城。遣酒井忠次大久保忠

勝等援之。然福釜松平系圖親俊下。不載其事。今從家忠日

記。松榮 參州之士柳原兵部上駿馬。號嵐鹿毛。神祖獻之大

將軍源義輝。義輝悅。贈手書及短刀。家忠日記。德川歷代。係

神祖請義元曰。吾幼而去。父母之邦。在尾州駿府。多歷年所。

先人葬祭。不能盡孝。願還鄉里。灑掃墳墓。以伸追慕之誠。義

元許之。至是始還岡崎。松榮紀事 義元使山田新左衛門守牙城。

神祖避之。居羅城。時人美其有識見。年譜附尾。○按本書係

往駿河。蓋誤爲三年事。故係于此。 勳舊譜第將士。歡呼拜趨。烏居忠吉進握

神祖手曰。臣今老羸。不能驅馳戎間。故多置倉庫。貯軍糧。願

我君養多士。振威名於四方。臣得保殘喘。面見之。則志願

畢矣。因獻歎嗚咽。神祖亦感動。松榮紀事

臣按。參河有三譜第。一曰巖津譜第。親氏公泰親公信光

公三世功勞之士是也。二曰安祥譜第。親忠公長親公二

世閥閱之家是也。三曰岡崎譜第。畏清康公之武威。跋慕

攀附者是也。或云安祥山中岡崎謂之三譜第。其說雖異。

通稱御譜第衆。昨之茅土。以爲干城。猗矣盛哉。

三年丁巳春。神祖又如駿河。改名元康。稱藏人。年譜。松榮紀

事。按創業記

係二年誤、三遠平均記作天文二十三年益誤、○德川歷代曰是歲神祖還岡崎、聞古老話清康公智勇兼備慕之、改名元康、其說似有據、而連書以義元汲引任官補藏人、按永祿九年神祖始任官、是年任官、諸書所不言、疑作者杜撰、故不取

永祿元年戊午。神祖在駿府。今川義元謂神祖曰。西參河卿累世所領將士多與信長者。盍伐之以取其地。神祖大悅。二月。發駿府還岡崎。宗族勲舊不召而集。寺部城主鈴木日向守叛屬織田信長。故先討之。時神祖年十七。酒井正親石川清兼為前鋒。縱火外郭急攻之。城兵拒守。本多作左衛門重次。作左衛門重信子。襲稱作左衛門。及弟九藏重玄先登。重玄戰死。松平重吉苦戰被創。重吉次子半彌之助重茂。及其兵名倉總助等

亦戰死。我兵不顧死傷奮擊。斬首百餘級。日向守力屈出降。

義元褒神祖之功贈佩刀。創業記家忠日記德川歷代松榮紀事年譜附尾日向守出降據德

川還給山中三百貫地。德川記德川歷代年譜附尾信長部將佐久間某

據廣瀨城。我兵進攻之。信長築寨守之。大久保忠世斬敵兵

津田兵庫獲首級。江原某斬神戶甚七。敵遂敗走。我兵大呼

逼城。松平清善與弟勘解由麾衆曰。左右皆敵寨。不可深進。

斂兵而退可十町。嚴隊顧視。寺部鈴木氏。○據上文寺部城主鈴木日向守既

降此或其族乎未詳舉母板倉氏及丹下中島等諸寨。出兵伺間將擊

我軍。石川清兼謂神祖曰。我君初出師。兩日之捷。慶無過此。

全勝兵道也。整旅而還。松榮紀事神祖又如駿府。松平監物家次

守品野城。家次內膳正清定子。信長築寨逼之。日夜攻擊。家次

悉力拒守。三月七日。夜潛出兵襲寨。敵兵驚擾。家次進擊。斬

隊將竹村孫七郎磯田金平戶崎平九郎瀧山傳三郎等。及

從兵五十餘人。上首級於駿府。神祖嘉其勇略。家忠日記。松

川歷代監物家次作。松平勘四郎信二。家忠日記亦云。一說信二。今據櫻井松平系圖。是歲。攻舉母梅

坪伊保等城。與水野信元戰于石瀨。渡邊半藏守綱力戰有

功。創業記。家忠日記。松榮紀事。德川歷代年譜附尾守綱源

五左衛門高綱子。後更忠右衛門。○三遠平均記。以攻寺部舉母梅坪等。為弘治二年。神祖十五歲時事。皆係月日。本年既差。月日不足。據今從上諸書。

二年己未。神祖在駿府。三月夫人關口氏生長子竹千代。年譜

家忠日記。德川歷代。今川義元國富兵強。遠參豪傑。率屬麾

下。岡崎之兵數告捷。威名大振。甲斐武田信玄。陸奧守信虎

信濃守大膳大。夫。剃髮號信玄。相摸北條氏康。新九郎長氏孫。左京大夫。各

求和好。義元驕泰。以為唾手可以得天下。將徵駿遠之兵。出

擊尾州。信長聞之。築城堡守要害。使水野帶力山口海老丞

守孝。德川歷代作弘憲。今從南行雜錄。其餘尾州諸拓植玄

蕃據丹下城。佐久間右衛門尉信盛。甚九郎。任右衛門尉。其

弟左京亮親盛。○按佐久間系圖。信盛弟有久六郎。盛善

照寺城。梶川平左衛門正繼。楠彦右衛門正治第二子。正治

家。故冒據中島城。佐久間大學盛重。彌太郎。據丸根城。飯尾

近江守定宗。其子隱岐守信宗。定宗織田伊勢守敏定子。信

記松榮紀事近江作遠江德川歷代子作弟今據織田家譜訂之 織田玄蕃據鷺津城山口

左馬助據中村城其子九郎二郎據鳴海城家忠日記松榮紀事但書左馬

助父子守中村鳴海二城而無九郎二郎名今據織田本信長記○按山口玄蕃允宗和第二子左馬助弘定慶長十九

年入大阪城以叛名稱偶同豈其祖先耶今無所考 左馬助叛信長誘大高沓懸二城

守將屬義元義元使鶉殿藤太郎長持播州青蓮寺記作長忠今從年譜三河物

語一本德川記抄德川歷代松榮紀事○長持諸書或作長照誤長照長持長子右近之名也 守大高沓懸

二城岡部長教守鳴海城先是義元部將葛山播磨守德川歷代

作備中勝吉今從松榮紀事 三浦左馬助飯尾豐前守淺井小四郎據笠

寺城倚角尾州諸城大高城乏糧告急駿府義元使神祖納

糧神祖時年十八英氣方銳譜第士踴躍相從幾及一千騎

急進軍陣于大高左右伺間將納糧信長出兵鳴海海邊訶

察城寨我軍以為信長邀糧道使鳥居四郎左衛門內藤甚

五左衛門義教○據寬永系圖四郎左衛門正成兄稱甚五左衛門而無名松榮紀事名義教豈正成之

兄耶未詳 內藤四郎左衛門正成右京進義清孫甚藏某子 石川十郎左衛門

杉浦藤次郎時勝杉浦勝吉偵之義教正成等皆曰敵嚴兵

絕我糧道獨勝吉言曰敵不欲戰可速納糧義教正成曰子

不見敵銳氣乎何言之繆勝吉曰不然敵欲戰則當下山而

陣今見我軍還陣山上是避我也納糧不可猶豫神祖然之

急遣兵向寺部梅坪二城縱火民屋而誘敵鷺津丸根二城

見煙起馳救之乘間納糧此神祖兵略之始也義元聞之大

感其功。世稱之曰大高納兵糧。三河物語係元年為神祖十

為十九歲時事。三遠平均記係弘治三年。皆誤。今從創業記家忠日記。松榮紀事年譜附尾。清水權之助

在大高城。尾擊敵兵有功。松榮紀事信長引兵還清洲。據信長譜。年信長移居清洲城。

神祖亦還岡崎。義元使神祖擊西參河之敵。故又

出兵攻寺部梅坪。舉母伊保等城。頒給所得米地於戰功諸

士。眾咸悅。謂似乃祖清康公英武矣。創業記家忠日記。松榮紀事年譜附尾。是

歲神祖又如駿府。創業記家忠日記。

臣按。世稱神祖之將略者二。曰大高納兵糧。曰一宮後詰。

然敵之強弱。其勢不同。自有輕重之分。何耶。織田信長公

驍將也。其鋒未易當。故岡崎諸將。以納糧為難。獨杉浦勝

吉能察形勢。而神祖決機。易如反掌。信長公見吾軍嚴整。

慮損士卒。故不邀糧道。知彼知己。豈徒驍勇而已哉。他年

與神祖講和之心。未必不萌於此也。一宮則異於是。今川

氏真闇將也。率兵一萬餘寇參河。以其半圍一宮城。神祖

以三千餘兵救之。直過其陣營。往而復反。如踐無人之地。

氏真畏其精銳。不敢交鋒。徒擁重兵。不能放一矢而去。雷

霆之威。虎豹皆股戰。苟非訓練節制之兵。烏能至此哉。

三年庚申。神祖在駿府。五月。今川義元將兵四萬餘騎。年譜

日記。信長譜。德川記。東宮記。松榮紀事。○按三遠平均記。義元兵二萬。號四萬餘騎。重編應仁記亦云二萬。疑得其實。

十七日。至參州池鯉鮒。神祖發兵從之。十八日。往久松。俊勝

阿古居家。謁所生水野氏。異父弟三郎太郎源三郎長福三人侍側。神祖欣然曰。吾寡兄弟。與汝曹姓氏。成隸萼之好。使

來參州。以為創業之資。因賜名三郎太郎曰康元。後為因幡守。源三郎曰康俊。為豐前守。長福曰定勝。為隱岐守。康俊初名勝俊。

松榮紀事作義勝。今從久松系圖。德川歷代。康元為關宿城主。康俊質于甲州。定勝為桑名城主。皆在下文。皆賜

松平氏。又名其家士平野久藏。竹内久六郎。勞之。俊勝大悅。

獻眉尖刀海螺。德川歷代以賜三子姓名。為納糧大高前事。今從家忠日記。松榮紀事。是日。義

元至大高。欲拔丸根。鷺津二城。進入尾州。使神祖攻丸根城。

守將佐久間盛重告急。信長神祖分一千餘騎為三軍。諸書不載

兵數。今據三遠平均記。命石川日向守家成曰。家成清兼弟。二子。忠成弟。一軍為正

兵。直進擊之。一軍為游兵。應機橫擊。一軍護衛麾下。松平又

七郎家廣。信光公玄孫。佐渡守親忠子。稱內膳。正後為紀伊守。世稱形原家。松平彌左衛門。

松平伊忠等七十二人為正兵。松平勘解由左衛門康定。康定

蓋大炊助好景弟也。說在四年二月。松平清善。松平信一等。五十五人為游兵。

酒井忠次。酒井重忠。石川數正等四十九人護麾下。各統兵

衆。石川家成。酒井忠次號令三軍。松榮紀事。十九日黎明。攻丸根

城。城兵開門爭出。神祖望見之曰。我多彼寡。當堅守防戰。而

反出鬪。此欲決死一戰也。不可浪戰。當以銃矢挑之。伺間拔

城家成。忠次申令軍中。而前鋒既交。松平善四郎正親。信光公五

世孫。善兵衛三光子。松平莊右衛門重利。二郎右衛門重吉長子。高力新九郎重

正。備中守重長第二子。寬又藏正則等戰死。正則清左衛門正治弟。神

祖麾衆進鬪。麾下壯士悉力奮擊。高力清長與平九八郎貞

能。監物貞勝長子。後為美作守。善鬪有功。遂斬佐久間盛重。代代記、三遠平均記、三河

物語並云、大學戰敗遁去、佐久間家譜曰、盛重放火燒城、佯死脫去、家譜之說似可信、然其後不見盛重之所在、亦不足

據、今從創業記、德川記、一本德川記抄家忠日記、松榮紀事、年譜附尾。城兵戰死一百六十餘

人。我兵進而豎旗城上。誓掃部氏信先登。駿河別將朝比奈

泰能攻鷲津城拔之。斬守將飯尾定宗。義元以為大高尾州

之要衝。當選守將。左右皆曰。元康陷丸根城。威名赫著。無過

此人。義元然之。乃使神祖守大高城。義元一朝拔丸根鷲津

二城。其心益驕。按行敵寨。以為蕞爾蟻垤。可一蹴而倒矣。距

前軍數百步。陣于桶峽。家忠日記、德川記、松榮紀事、年譜附尾。信長在清洲。聞

盛重之報曰。大學先我一日。不可不救。將佐諫曰。彼衆我寡。

不如據城固守。信長曰。敵狃今朝之捷。士卒驕惰。我自笠寺

東過善照寺城。急擊義元麾下。則必大得志。此擊不意之術

也。信長譜、德川記、德川歷代。梁田出羽守曰。此奇計也。必得大捷。松榮紀事、信

長登時發清洲。從兵僅五騎。比至熱田。不過二百。織田本信長記。先

詣熱田社禱戰勝。密與祠官謀。鳴金革。信長高聲告衆曰。神

殿有金革之聲。是神助我也。戰勝必矣。衆皆踴躍。至中島衆

兵踵至。然未滿二千。松榮紀事、○本書曰、信長發清洲、從兵不過十騎、比至熱田、衆軍踵至、家忠日

記曰、從兵三千餘騎、織田本信長記、載五騎姓名、其餘為得實、今從之。

臣按壬申之亂吉野大將大伴吹負傳播高市牟狹村屋三神保佑吉野之憑語以勵衆庶一士心遂使天武帝篡奪如其志此吹負之將略也如齊田單用神師晉李矩稱子產神教之類自古皆用此術信長公豈能知前古之事者哉特以英明之資所施略同不期而然此其將略過人者也

分爲二隊尾州驍兵佐佐隼人正千秋新四郎巖室長門守志必先登遙見信長之旌旗進與義元前軍鬪敗死前軍進其首義元益驕不設備張宴山間大犒士卒時黑雲歟起大雨雷電杳冥不辨咫尺信長乘之偃旗卧鼓潛出義元陣後

令曰勿向他陣必擊義元麾下鬪士競進信長揚旗急擊之

前田又左衛門利家年十八利家封加賀秀吉公賜氏稱曰羽柴筑前守以旌其功至從二位

權大納言先臣城所友仙曰縫殿助家則子系圖作藏人利昌子誤先登獲級信長悅梁田

出羽守織田造酒丞林佐渡守通勝林佐渡守通村孫新左衛門通安子初稱新五

郎林氏元稻葉氏也中世分居濃州安八郡林邑故稱林氏揮槍猝至麾下驚擾義元出

幄戒之服部小平太進擬義元義元拔短刀斫其膝毛利新

介以槍刺義元遂獲其首駿兵大崩潰信長乘勝追擊斬首

二千五百餘級織田本信長記作三十餘級今從家忠日記德川記信長譜松榮紀事駿州銳

兵三浦左馬助齋藤掃部庵原左近庵原莊二郎朝比奈主

計西鄉內藏助富塚修理家忠日記富塚作倉塚今從德川記松榮紀事松平攝津

守富永伯耆守。四宮右衛門。井伊信濃守直盛。宮内少輔直宗子。油

井藏人。松井兵部。松平治右衛門等。六十餘人戰死。其餘將

士皆棄城走。信長戢兵還清洲。家忠日記德川歷代松榮紀事。○家忠日記德川記並曰。

義元之將岡部五郎兵衛長教在鳴海城聞義元預命勇氣不撓固守十餘日信長使佐佐內藏助成政攻之不下信長

感其勇壯講和長教從之請得義元之首以歸駿州信長授之長教悅出城去謂士卒曰吾雖守城却敵而不立功徒歸

駿州非吾志也敵誇大捷守禦必懈乘其不意急襲擊之則拔敵一城甚易水野藤九郎信近所守參州刈屋城在我歸

路不如發兵襲取之衆從之信近信元之弟也聞駿兵大敗果不設守備長教夜遣伊賀之謀潛入城放火城兵驚騷長

教急攻之信近戰死城陷長教引兵還駿府氏真授書褒其忠勇此雖當時之戰爭而不關係神祖之事故附于此

神祖在大高城未聞其事。駿兵在城中者聞報皆亡去。岡崎將士議曰。駿兵皆棄城走。我獨為誰守此孤城乎。不若全軍而

還。神祖曰。軍中多訛言。須審其實而去。事若蹉跌。必受姍笑

矣。時水野信元在緒川城。以其有舅甥之好。使其臣淺井六

之助道忠告義元之死曰。明日信長將來攻。須乘夜速去。神

祖以為信元舅氏也。然黨於信長。未可輕信。遣人探詢。乃得

其實。將佐皆勸速去。神祖曰。闇夜與敗兵雜糅。則必迷道路。

須待月出而去。敵若來襲。速決一戰。屹然不動。頃之天霽。月

出。乃以道忠為鄉導。整軍而還。寇賊遮道。本多百助信俊太

左衛門重信孫。太郎。左衛門某第二子。屢跋馬射之。至池鯉鮒驛。刈屋土寇千

餘人將邀敗兵。道忠前驅大呼曰。我刈屋之兵也。不可侵掠。

土寇聞之。不敢支吾。道忠從至今村邑而還。後賞其功。賜采

地一百貫。年譜、創業記、三河物語、家忠日記、德川歷代、松榮紀事、神祖不

入岡崎城。以為初義元出軍。使三浦飯尾岡部等守岡崎城。

未有還我之意。義元雖死。率意入城。非義也。駐軍大樹寺三

日。松榮紀事、每過義元戰死之地。必下馬。中興源記、其篤于信義。率此

類也。駿兵守岡崎城者。聞義元死。皆出走。神祖曰。彼棄則吾

拾之。二十三日。入岡崎城。神祖六歲出岡崎。在外十四年。初

得復舊。宗族勲舊。老少歡呼。士氣大奮。三河物語、東宮記、參

州舊臣。絡繹繼至。然前屬信長者。據城不降。神祖發兵。攻舉

母梅坪二城。又攻廣瀨城。城主三宅右衛門佐據拂楚阪。拒

之。足立金彌中丸。斃前軍頗沮。神祖躬操兵。勵衆。大森與八

郎直前揮槍。衆復競進。城兵敗走。逐北至城下。大喊而還。信

長使織田玄蕃守沓懸城。神祖攻之。放火城下而去。信長出

援兵躡之。勢甚銳。大久保忠俊為殿。全軍而還。信長命水野

信元攻岡崎。神祖出兵戰于石瀨。松平信一。石川新九郎正

總。杉浦八十郎。德川記作八郎三郎、今從家忠日記、松榮紀事、鳥居四郎左衛門大

原左近衛門。矢田作十郎。蜂屋半之丞。大久保忠俊。及姪忠

世。忠佐。高木九郎廣正。後任筑後守、大田甚四郎吉勝。松井忠次

等。揮槍力戰。敵放鳥銃。中松井忠次眼。忠次進擊其敵。殪之。

寬圖書重忠。清左衛門正治長子、初稱平三郎、奮戰被重創。特賜書褒之。大

久保喜六郎忠豐。獲級。忠豐忠俊第三子、松榮紀事喜六作喜八、今據諸士傳略訂之、大岡

助十郎忠次戰死翌日又與信元兵戰於刈屋城外。○家忠

榮紀事並云俗呼此地曰十八町兩家之士或親族或朋友故互相媿竭力

交鬪大久保忠勝及弟忠豐從父弟忠世大田吉勝等有斬

獲功杉浦八十郎村越平三郎戰死兩軍戰疲戢兵而退又

攻寺部舉母二城拔之進至山中攻醫王山寨久松俊勝先

登敵兵以槍傷俊勝之肩俊勝截斷槍幹輒入寨縱火衆兵

相踵競進遂破之岡崎武威日熾月盛西參河豪傑歸降者

益多是歲始出兵於東參河攻長澤鳥屋根城守將糟屋善

兵衛出城防戰榊原彌平兵衛忠政數挺群進鬪神祖褒其

勇敢改稱早之助人皆榮之。年譜創業記三河物語家忠日記東官記三遠平均記德川歷

代松榮紀事○松榮紀事曰早之助或稱隼之助言其擊敵迅速如隼也德川記以此事係四年八月按明年七月糟屋

善兵衛又據長澤城而戰以故錯誤耳

四年辛酉二月水野信元侵掠近邑神祖又出兵戰于石瀨

家忠日記係三年六月今從松榮紀事石川數正與敵兵高木善二郎清秀接

槍。清秀六郎左衛門宣光子後稱主水正歸神祖在下文二人知名之士雌雄未決我

軍與緒川之兵爭戰方酣本多忠真植村莊右衛門正勝松

井忠次等各有戰功忠真接槍一日七次被創猶鬪人皆稱

之敵兵終敗走。三河物語松榮紀事並云忠真接槍及第七次敵皆敗走故參河人稱曰六度半槍○家

忠日記三河物語松榮紀事並云去年石瀨之戰緒川之兵有戴金鯉鑿鑿者矢田作十郎遣使乞之敵知作十郎之勇

敢贈之蜂屋半之丞強乞之作十郎予之曰勿辱此首鏗是日半之丞戴之赴陣既而石川數正先接槍敵兵開笑故半

之丞取之此後每戰先登神祖發兵攻廣瀨伊保二城板倉彈正重定黨

于信長據中島鄉鈔略村里神祖以松平大炊助好景為將

擊之好景初稱又八郎大炊助忠景重定不能禦退保岡城

神祖進兵攻之重定奔東參河神祖賞好景之功賜中島長

良二邑年譜創業記家忠日記驚峯文集先是吉良義安為

東條持廣養子義安左兵衛佐義堯在東條城義安弟義諦

在西尾城年譜寬永系圖松榮紀事義諦作義昭三遠平均

記本光寺碑他與今川義元子上總介氏真為親族義安娶

書或作義照誤

清康公女為神祖外戚故氏真懷疑留義安於駿州藪田邑

松榮紀事○按德川系圖清康公一女初嫁松平上野介康高再醮酒井忠次而不言其適義安松平家女子譜清康公

女有常在院桂室泰榮抱病終移義諦於東條使牛窪城主

于參州山中豈此人乎未詳

牧野新二郎成定松榮紀事作貞成八年九年書牛窪城主

有右馬允成定牛窪城主不應有二入蓋守西尾城將寇岡

崎神祖發兵攻東條西尾二城松平好景及弟康定善戰有

功家忠日記松榮紀事○按德川系圖諸士傳略好景弟無

之祖父也蓋有神祖還岡崎段嶺新城武節三城之主管沼

小法師○段嶺或作田嶺馱嶺國長篠主將菅沼左衛門貞

景設樂越中守貞通西鄉彈正左衛門正勝彈正左衛門菅沼

新八定盈等定盈織部定如叛氏真降岡崎家忠日記德川

○前車後語集曰永祿初神祖以本多百助信俊為使說正勝歸降正勝奉命誘東參河諸將野田菅沼定盈段嶺菅沼

小法師長篠管沼貞景設樂貞通等歸于神祖據之諸將歸附者正勝之功也附以備改氏真闇弱。變三

浦右衛門。甲陽軍鑑曰武藤氏子初稱武藤新三郎德川歷代松榮紀事曰小原肥前守子嗣今川老臣三浦

二郎右衛門家故冒三浦氏今從之疎斥舊臣。日夜耽樂。怠

於政事。無報讎之志。信讒屢疑神祖有貳。故神祖欲與之絕。

參酌諸書大意織田信長聞之。以為與神祖講和。勦力以擊氏真。則

霸業可成也。時水野信元自刈屋抵清洲。說信長曰。元康雖

吾甥。以氏真之故。數與吾鬪。而氏真猜忌。積不相能。氏真憤

之。欲滅參河。元康雖年少。而天資勇武。決不納款。不如與元

康講和。經略美濃。以滅齋藤龍興。信長悅。召將佐謂曰。我世

與岡崎為仇讎。雖數挑戰。勝敗未決。今欲與岡崎連和。我征

西方。使元康征東方。則大得志矣。乃使瀧川左近將監一益

八郎一勝子更稱伊豫守求和親於石川數正。信元亦遣使神祖勸之。神

祖名數正及其叔父家成。酒井忠次。酒井正親。本多廣孝。植

村正勝。天野康景。高力清長等議之。忠次曰。今欲以一國之

兵。敵氏真。信長兩將。非國家之計也。氏真無復讎之志。而溺

於酒色。不恤士卒。其亡可翹足而待也。與信長和親。則保國

之利。莫善於此。諸將皆曰。往年義元雖似扶助廣忠公。實欲

滅之。公幼為質在駿府。參河賦稅。義元皆收之。每有徵發。必

以參河之兵為先鋒。不顧其死亡。及公成長。或為丸根前驅。

或為大高留守。使我犯難以餌敵兵。推義元之志。可謂敵國。

非與國也。忠次議是。神祖領之曰。臨難隕命。固士之常。然吾幼時。譜第之士多戰死。是終身之憾也。因流涕淒楚。諸將亦洒泣感其言。乃使數正報一益。信長大悅。遣其宰林通勝及一益會數正及高力清長于鳴海。定尾參國界。收丹下鳴海沓懸廣瀨舉母梅坪大高刈屋岡寺部長澤鳥屋根等戍兵。還清洲。屬城寨於岡崎。神祖使植村正勝告與信長平於守城諸將。酒井將監忠賀。一本德川記抄作忠尚曰。忠次之兄。忠次父祖及兄皆稱左衛門。而系圖失名。遂差一世。忠賀忠次兄之子也。德川歷代亦作忠尚。今從諸士傳略。在上野城。聞之遽來。岡崎曰。信長為隣國。一旦與之和固可。公必勿往尾州會之。夫人郎君在駿府。信長不可必信。請審圖之。

神祖曰。汝言固善。然既與信長定約。食言不可。須以汝所置駿府質。與吾妻子同生死。忠賀不悅而去。鳥居元忠本多廣孝平巖親吉等進曰。將監必應氏真而為亂。不如殺之。以蠲後患。神祖曰。將監之言亦非無理。彼必不能反。舍之勿殺。從此忠賀稱疾不出。松榮紀事。德川歷代。神祖遣使清洲。約與信長盟。信長大悅。修橋道。張治具。水野信元亦來會。神祖率石川數正其叔父家成酒井忠次植村正勝天野康景高力清長等百餘騎如清洲。信長使林通勝瀧川一益菅谷九右衛門等迎之。熱田神祖憇于正滿寺。少焉入清洲。觀者填咽城門。本多平八郎忠勝。平八郎忠豐孫。忠高子。後任中務大輔。為桑名城主。時年十四。揮眉尖刀。

大呼曰。參河元康來此。汝曹何無禮之甚。眾皆跽伏。信長迎神祖于羅城。延入牙城。禮接敦篤。植村家政持神祖之刀。近座。眾呵之。家政曰。捧主人之佩刀。何怪之有。信長聞之。謂眾曰。我久聞植村之名。汝輩不之知。勿怪矣。座定。信長謂神祖曰。和親既成。喜莫踰此。當作水魚之歡。以兩旗定天下。神祖拜謝。其盟書曰。織田為天下主。則德川為幕下。德川為天下主。則織田為其幕下。有違斯盟。明神殛之。信長厚饗神祖。遺長光刀。吉光短刀。賜行光刀於植村。家政曰。今日見子之舉措。勇氣勃然。幾如樊噲。在鴻門。禮畢。神祖出。信長送之郊外。使通勝一益九右衛門。送之熱田。神祖還岡崎。翌日。信長使

通勝九右衛門往岡崎謝之。

東宮記、三遠平均記、松榮紀事、○松榮紀事以神祖盟于清洲

為正月事。然前有石瀨之戰。係二月前後錯亂。故不係月。氏真聞神祖出盟。大怒。遣使岡

崎。切責之。酒井正親遣成瀨藤五郎於駿府。就寵臣三浦右衛門謝曰。寡君既以妻孥為質。豈敢懷携貳乎。信長勢日彊大。欲滅岡崎。不與之佯和。則難保朝夕。此誘敵之謀。而非實然者也。氏真聞而意解。家忠日記、三遠平均記、松榮紀事、吉良義諦據東條。

黨于氏真。松平好景數與之戰。康定亦力戰有功。賜食邑褒之。神祖使本多廣孝守小牧寨。小笠原三九郎守糟塚寨。松

井忠次守津平寨。

年譜係三年。今從家忠日記。按德川記係弘治二年誤。

日與義諦接

戰。酒井忠賀在上野城。義諦出兵攻之。四月十五日。松平伊

忠奉命救上野。義諦聞好景分兵於上野。襲中島城。時好景在深溝城。馳入中島。與義諦戰破之。好景乘勝逐北。至善明堤。斬獲頗多。義諦見好景兵少。無後繼。自土呂城邊悉兵來圍。好景破銳挫堅。縱橫馳突。鞞絕鞍搖。下馬步戰。兵敗死之。時年四十四。松榮紀事曰。好景中敵兵尾崎修理之矢創甚。山岡藥醫來取其首。今從本光寺碑諸士傳略。

弟十郎左衛門忠次。太郎左衛門定清。久大夫景則。新八郎忠憲。孫十郎定政。松平内記。板倉八右衛門好重等。三十餘人皆戰死。家忠日記。松榮紀事。無忠次。定政二人。今據德川家譜補之。好重八右衛門賴重子。好景信光公五世之孫。非帝長於武事。兼善倭歌。文雅士也。人皆惜之。神祖以其子伊忠為嗣。居深溝城。年譜。創業記。家忠日記。本光寺碑。松榮紀事。

義諦之族荒川甲斐守賴持。松榮紀事作義虎。今從源氏系圖。德川歷代。與義諦

不相善。就酒井正親乞降。神祖聽之。賴持迎正親於荒川城。

合兵攻西尾城。牧野成定不能拒。退保牛窪。正親入西尾城。

將攻東條。義諦部將富永伴五郎陣于藤波。暇欲攻小牧寨。

本多廣孝與正親合兵防戰。小笠原三九郎松井忠次出糟

塚津平寨救之。成定之兵須瀨宮内進擊正親。正親揮槍縱

殺之。使從兵取其首。富永伴五郎引滿射廣孝。廣孝以槍刺

伴五郎。獲其首。我兵大久保大八郎鳥居半六郎戰死。義諦

隊將有挺衆進鬪者。阿部忠政射斃之。伴五郎義諦勇將也。

德川記以此戰係弘治二年九月曰。伴五郎擊殺鳥井半六郎。大久保大八郎進擊伴五郎。伴五郎斫之大八郎捨刀相

搏竟獲其首敵兵擊殺大八郎與此異今從三河物語家忠日記三遠平均記松榮紀事據諸士傳略伴五郎為本多廣孝所擊至今有伴五郎塚人稱之本多系圖自其戰死義諦兵撓

敗走入城我兵攀壘壁急攻之義諦力盡而降神祖使之居

岡崎。○按年譜創業記攻西尾東條二城及藤波畷之戰皆係三年德川歷代係弘治二年誤今從家忠日記松榮

紀事但松榮紀事誤為九月事據家忠日記訂之德川歷代又云伴五郎名元忠未知是否六月神祖賞

正親之功賜西尾城神祖賜城群臣是為其始。○按年譜以下荒川賴時叛

吉良義諦酒井正親襲西尾城賜西尾城于正親給富永伴義諦歸降皆係五年今從家忠日記松榮紀事

五郎采邑於本多廣孝津平邑於松井忠次各賜書褒之家忠

日記松榮紀事使鳥居忠吉松平信一守東條城賞荒川賴持之功

以神祖異母妹嫁之。家忠日記松榮紀事○按異母妹廣忠公繼室戶田氏所生後稱市場殿德川

家譜為神祖同母妹誤今從松榮紀事及雜錄七月神祖欲攻牛窪使設樂甚三郎

為之備。甚三郎後稱攝津守○按慶長十九年大阪之役台德公前鋒有設樂甚三郎貞光蓋此子孫也未詳

氏真別將糟屋善兵衛小原藤十郎。年譜家忠日記松榮紀事作藤五郎今從創業

記德川記德川歷代歷代又云藤十郎名鎮吉肥前守鎮實子未知是否附以備攻據長澤城剽掠近

邑神祖使松平信一石川家成攻之不克親將三千餘騎攻

牛窪歸過長澤令士卒曰長澤城兵邀我歸途則山路嶮隘

進退失據宜分兵為二隊一隊過山下大路一隊屬我麾下

過山南時長澤城中火山下兵望見之謂山南兵拔城縱火

急馳登麾下兵亦競進兩隊合一勢不可當信一家成亦謂

神祖來援爭先而進城兵恒擾悉亡去本多忠真刺敵斃之

命姪忠勝取首。忠勝哂曰。我豈假人力而成功乎。進刺敵一

人。獲其首。渡邊守綱擊藤十郎斬之。德川記曰。藤十郎棄城走。今從年譜創業記家

忠日記松榮紀事按三遠平均記係八年誤神祖褒之曰。藤十郎今川家之驍兵。

今汝獲之功莫大焉。諸士傳略善兵衛棄城走駿府。城遂陷。忠真

白忠勝之勇於神祖曰。平八雖幼。銳氣邁人。後必成名。神祖

大悅。三河物語松榮紀事

五年壬戌春。西參河粗平。神祖欲經略東參河。氏真將鶉殿

長持據西郡蒲形城。使松井忠次圖之。忠次與從士石原三

郎左衛門謀。招甲賀人伴與七郎資定。後更稱帶刀伴中務勝永

伴太郎左衛門資家。伴伯耆守資綱等八十餘人爲謀者。八

餘人松榮紀事作十八忠次率二百餘兵。陣于城下。伏甲賀

兵於險要。三月十五日夜。一本德川記抄為九潛使謀放火

樓櫓。長持以爲城中有反者。遁於護摩堂。伴資定追斬之。長

持長子右近長照。次子藤三郎長則出走。伴資綱生禽之。悉

斬城兵。神祖進兵應之。聞城陷而歸。使久松俊勝守蒲形城。

褒忠次之功。家忠日記德川記一本德川西郡爲要害之地。

氏真數出兵爭之。俊勝據城拒之。既而俊勝還岡崎。每神祖

出師爲留守。使長子康元守西郡城。先是氏真欲殺神祖任

子。然以其外祖關口親永爲豪族而止。石川數正以爲郎君

在駿府。勢甚危殆。一朝見殺而無一士人殉死。是邦之辱也。

告之神祖。必不見聽。乃留書己家。竊往駿河。保護公子。聞氏真憂長照兄弟見執。就親永而謀之。議易質。氏真許之。數正歸岡崎。言其狀。神祖大悅。還長照兄弟於駿河。氏真還夫人公子於岡崎。數正意氣揚揚。雍樹公子而歸。時人壯之。譜第將士。皆往念子原迎之。相謂曰。甚矣氏真之慙也。以長持子換公子。我福而彼禍。其無識可知也。代代記家忠日記德川記德川歷代年譜附尾

松榮紀事

臣按。君子小人之所由判。唯在義與利而已矣。石川數正欲往駿府與公子同死。何其喻於義而勇於爲也。及豐臣秀吉公軍于樂田。啗以大利。數正以世臣叛主君。挈其家

而奔大阪。何其喻於利而昧於義也。秀吉公不乏虓虎雄武之士。豈真欲數正臣於我者哉。此特欲弱濱松之謀而非其本心也。數正貪恠無饜。見利忘義。既而秀吉公雖封之以松本城。而當時大阪士大夫皆鄙之。至井伊直政使于大阪。不與數正交一語。抗言于衆。謂之人面獸心。數正忸怩不能對。誠患失鄙夫哉。夷考其實。數正驍勇逸群。摧堅挫銳。然此皆血氣之勇。而不能知義理之正。故一旦憤激。雖有君子之行。而終不免與小人同歸。哀哉。

神祖既與氏真絕。氏真怒殺親永。神祖以酒井忠次爲將。攻八幡牛窪。敵兵據小阪井東岡拒之。我兵戰疲將退。神祖率

一千餘騎救之。敵兵潰走。逐北多獲首級。縱火焚八幡人家。渡邊守綱力戰將退。近藤傳二郎重創不能步。呼守綱。守綱肩之而歸。松榮紀事諸士傳略諸將言于神祖曰。不圖今日見援。神祖曰。吾欲擊佐脇之敵出兵。聞小阪井有戰鬪而來進。非所豫料也。松榮紀事三月。井伊谷城主井伊肥後守直親家士小野但馬。直親信濃守直盛子讒直親於今川氏真曰。直親謀反。竊通岡崎氏真怒。發兵欲討直親。氏真族新野左馬助。新野今川氏三家之一說見上德川歷代曰。左馬助名親規。未知是否。與直親交最親。諫氏真曰。臣能知直親之為人。非敢反者。事若覈實則臣滅之。因遣使詢之。直親對曰。先人信濃守死於故君之難。信長君父之讎。豈敢從之乎。左

馬助白之於氏真。事遂寢。直親欲往駿府分疏其事。而憚多兵似犯上。從者僅二十餘人。途過懸川城下。城主朝比奈泰能不知直親冤枉。既雪。意其襲駿府。出三百餘兵擊之。事出不意。直親不能辨別。竟戰死。氏真不知曲直之所在。沒其米邑。直親有子纔二歲。稱萬千代。氏真欲殺之。左馬助為之請命。氏真聽焉。左馬助悅鞠育之。及左馬助戰死。引間其妻撫養孤兒。氏真又欲殺之。妻恐。潛送僧寺匿之。妻再醮松下源二郎。養孤兒於其家。兵部少輔直政是也。家忠日記德川記德川歷代年譜附尾松榮紀事先是神祖寓居駿府。今川義元取岡崎將士之妻孥為質。或送之駿府。或納之吉田城。及神祖與氏真絕。將士皆

棄質竭忠神祖。吉田城主小原肥前守資良

德川歷代作鎮實今從諸士傳

略為懲將來。捕松平清善女。松平家廣少子。及管沼定盈西

鄉正勝水野藤兵衛大竹兵右衛門等子姪弟妹十一人。串

於城下龍念寺前殺之。神祖聞之。大悲慟。

家忠日記德川歷代松榮紀事○諸

士傳略曰小原資良串松平家廣第二子左近於形原前井尾濱殺之前車後語集曰西鄉正勝姪孫四郎亦被串而死

附以備考

臣按德川歷代不知何人撰託名大須賀康高極口臧否

當時人物避禍之計巧矣。叙事雖詳。率多杜撰之說。不足

憑據。唯其論小原資良殺岡崎之質甚適機宜。其言曰。凡

送質者。雖懷携貳。而王者無殺其質之理。生存之撫養之。

則有敵不能割愛而終歸我者。縱不能然。或有為敵擒我

子弟而易質濟事者。故質不可殺。此兵法也。肥前守不知

兵而濫殺之。殺之謂甚。况極其慘虐乎。宜其敗亡而不能

保首領也。此論頗確。故著于此。

七月。遠州高山城主奧山修理亮叛氏真。屬岡崎清洲。氏真

攻城拔之。

家忠日記東宮記松榮紀事

九月十一日。氏真命朝比奈紀伊

守泰長

松榮紀事無泰長之稱今據前車後語集書之

夜襲西鄉正勝五本松城。正

勝戰敗死之。

前車後語集曰從兵死者七十三人

長子孫六元正在月谷城。聞

泰長襲父。馳至五本松。正勝既戰死。元正從兵纔十餘人。衆

寡不敵。亦戰死。泰長又拔月谷城。元正弟孫九郎清員。

後稱左衛

門見執過萬丈谷奮敵所執祛陷深谷中而遁至野田往從
 母弟菅沼定盈家告父兄皆死定盈白之神祖即召清員賜
 正勝采邑清員謝曰元正有孤願使彼繼家然童稚未習軍
 旅臣代其役神祖義之賜書褒之按家忠日記元正戰死弟
 清員馳救正勝父子勦力
 擊退駿府之兵據此說則正勝實未死然松榮紀事前車後
 語集叙事頗詳今從二書○前車後語集曰清員就定盈白
 正勝元正敗死之狀神祖使大須賀五郎兵衛大須五六左
 衛門本多信俊植村家政渡邊久左衛門茂高井四郎左衛
 門與清員率兵擊朝比奈泰長大破之神祖褒其功賜正勝
 故邑元正孤子義勝後稱右京亮皆他書所不載附以備攷
 二十九日神祖又攻八幡酒井忠次為前鋒二連木牛窪佐
 脇八幡之敵據赤阪拒之敵將板倉重定急進鬪我兵多死
 傷重定乘勝來追渡邊守綱石川正總石川新七郎為殿矢

田作十郎失馬為敵所圍幾危守綱留戰救之作十郎得馬
 而歸御油至赤阪守綱回轡攘敵凡十接槍三時人稱其勇
 敢曰槍半藏神祖聞前軍敗疾馳救之重定見神祖之旌旗
 將退我兵突戰近藤傳二郎擊重定獲其首重定女婿板倉
 主水亦敗死敵兵潰走不能入八幡佐脇而皆逃奔牛窪二
 連木故八幡佐脇二寨一時悉為我有年譜創業記家忠日
 記松榮紀事○按三
遠平均記以斬板倉重
 定為十一年事亦誤

松井甲太郎書

烈祖成蹟卷之一終

刺者列名

神田小柳町十三番地

木邨嘉平 十三枚外題字

神田鍛冶町四番地

江川八左衛門 七枚

呉服町十一番地

宮田六左衛門 五枚

木挽町三丁目十五番地

五氏括
竹口茂兵衛 六枚

濱町二丁目一番地

同
松島政吉 三枚

麴町十三丁目十番地

瀧澤叢吉 五枚

神田旅籠町二丁目十三番地

竹口瀧三郎 五枚

下谷坂本三丁目十九番地

五氏括
江川徳三郎 三枚

八官町四番地

同
杉田金助 一枚

中之郷村早三番地

江川八左衛門括

江川仙太郎一枚

木邨嘉平括

--	--	--	--	--	--	--	--	--	--

烈祖成

績

安積覺編次

卷二

東 京 圖 書 館

二
〇
冊


三
五
號

六
八
架

三
三
函

雜
史
類

和
書
門



東書
烈祖成績卷之二 起永祿六年
終十二年

安積覺 編次

永祿六年癸亥春。織田信長與神祖約。以女妻世子竹千代。

年譜家忠日記。松榮紀事。五月。神祖放鷹郊外。抵深溝城。城主松平伊忠

饗之。神祖賜蒼鷹於伊忠。曰。長澤與敵境相接。最為要害之

地。武田信玄屢所覬覦。守彼城者。無過于汝。為吾往守之。伊

忠拜命之辱。六月。移于長澤城守之。信玄不能出兵。神祖賜

書褒之。增采邑。家忠日記。鷲峯文集。水光寺碑。松榮紀事。七月。神祖為攻吉田城。

築寨於小阪井牛窪。親按行之。城主小原資良出兵陣于小

阪井。渡邊守綱蜂屋半之丞揮槍力戰。松山宮內放鳥銃攻

之守綱被創。我兵疲頓。平巖親吉率兵來援。敵兵敗走入城。

年譜創業記家忠日記松榮紀事 參河有淨土真宗寺三。曰佐崎上宮寺。曰

針崎勝鬘寺。勝鬘諸書皆作正滿。今訂之。下倣之。○四年神祖與信長講和。憇于正滿寺。蓋其地在尾州。

而與此自異。故不改。曰野寺本證寺。無知士庶。崇奉其法。根據盤結。時

神祖築寨佐崎。頗乏糧食。九月。酒井正親使菅沼藤十郎定

顯。後稱越後守。借糧於上宮寺。住持僧不應其求。發言無禮。定顯

怒。奪糧而還。僧徒憤恚。會一宗僧於上宮寺。環甲提兵。入定

顯家。取糧還寺。定顯訴于正親。神祖聞之怒。命正親捕首惡

僧斬之。僧徒益憤。十月。諭國中檀越聚兵甲。誘潛通于今川

氏真者作亂。譜第之士多其門徒。皆黨之。○歸依一向宗者。俗謂之門徒。僧

徒書牌授之。曰。進足往生極樂世界。退足墮落無間地獄。由

是其志彌堅。吉良義諦以東條叛。荒川賴持不顧姻親而黨

於義諦。松平家次與賴持比。以櫻井叛。松平七郎親光。故岡崎城

主左衛門尉昌安子。以大草叛。酒井忠賀素有叛心。以為得時。據上野

城。誘烏居四郎左衛門芝山。小兵衛定好。本多彌八郎正信

等十餘人叛。正信佐渡守。為執政元老。蜂屋半之丞。久世平四

郎長宣。平大夫廣長第二子。○德川記又書久世三四郎。據諸士傳略三四郎廣宣長宣子。此時尚幼。德川記誤

矣。算正重。渡邊八郎五郎義綱。清兵衛有網第二子。渡邊源五左衛門

高綱。二郎四郎氏綱子。其子守綱等八十餘人。據勝鬘寺。大津半左

衛門犬塚甚左衛門等。及吉良近邑僑人。據本證寺。大田善

大夫吉正正或作政矢田作十郎戶田三郎右衛門忠次等十餘

人忠次左近政光之孫莊左衛門光忠子據上宮寺土呂寺亦其宗門大橋傳

十郎佐馳甚兵衛等七十餘人據寺作亂無慮數百人宗族

勳舊悉黨邪徒寇賊蟻聚糜爛鼎沸土呂針崎在岡崎南距

岡崎甚近野寺佐崎櫻井距岡崎一里餘上野城在其西北

上和田去岡崎可半里及賊出兵必遞舉烽神祖每見烽起

即馳救諸城賊見其來懾伏入寺酒井正親守西尾城與野

寺及荒川賴持兵戰酒井忠次築寨塞上野賊往來之路松

平伊忠守深溝城按先是伊忠移在長澤蓋聞亂還守本城也本多廣孝守土井

城與土呂針崎賊戰松平清善德川記作玄蕃允家清松榮紀事作玄蕃允清宗按家

清清善孫清宗清善子也今從家忠日記守竹谷城松平紀伊守家忠紀伊守家廣子初稱

又七即守形原城松平信一守藤井城松平左馬助親俊○松榮紀

事作右京亮據福益松平系圖右京亮親俊父親次也德川記作右京亮康親康親親俊子也亦稱右京亮福益系圖親

俊下載擊野寺針崎之賊戰守福益城與野寺櫻井賊戰石功今據之定為左馬助親俊

川家成其姪數正本多忠真其姪忠勝植村家政植村正勝

內藤彌次右衛門家長及弟三左衛門信成家長彌次右衛門清長子信成

實島田久右衛門子清長之鳥居忠吉松井忠次天野康景

甥清長子養之後稱豐前守柴田七九郎康忠○諸士傳略曰康忠善射每戰射敵得名

拾所射矢六十三隻書死傷者姓名送于我軍神祖褒之賜諱字使書六十三字於旗幟改稱七九郎表六十三之數也

按傳略載家傳之說如此然平巖親吉寬重忠八國府甚六不知其何時何地所戰也

林藤助等一百餘人。○按家忠日記德川記德川歷代松榮

忠諸士姓名今不一舉之在岡崎志操益堅日與賊兵戰大久保忠勝

與其族三十六人築堡上和田與土呂針崎之賊戰松平三

藏○松榮紀事松平作松井按此時無松井三藏者本書十

歷代內藤系圖有松平三藏三左衛門忠倫之弟也此時

黨于賊據大草城亂平流寓肥後更稱左助與此自異築

寨禦佐崎賊小栗大六與其宗族守筒針寨數與賊戰土呂

針崎雖與岡崎相近上和田堡在其中間故賊不能侵岡崎

家忠日記松榮紀事並云大久保忠俊築堡上和田德川歷

代曰忠勝居宅在上和田一說為忠俊居宅非也今從之每賊至忠勝鳴海螺神祖聞之亦馳救之賊懼而退三河物

川記德先是成瀨藤藏正義藤左衛門正賴子正賴與林藤助

八國府甚六等合謀納廣忠公於岡崎城六與僚友忿爭擊殺之懼罪逃于遠州至是聞亂挈

妻子來歸岡崎請赦其罪神祖嘉其志宥之正義每戰挺群

成瀨夏日二郎左衛門吉信九郎左衛門吉久子大津半左衛門乙部

八兵衛據野羽故壘黨于賊鈔掠邑里○按上文大津半左

後黨于夏日吉信松平伊忠雖屢攻之有利而敵兵固守不

屈八兵衛竊納款導伊忠兵入城故城兵不得拒半左衛門

僅脫入針崎伊忠急攻之吉信窘迫匿倉庫就獲之伊忠馳

使岡崎上陷野羽故壘擒城將夏日吉信之狀神祖報曰吉

信參州豪士也伊忠不日而拔壘擒將其功偉矣初八兵衛

與吉信交睦故黨之至是謂伊忠曰吾知野羽故壘難守為

請吉信命歸降。願生之。伊忠感其志。請釋吉信及八兵衛。神

祖聽之。賜二人於伊忠。家忠日記。德川歷代。松榮紀事。本多廣孝所守土井

城。介于敵境。爭戰累日。又攻東條城。有功。神祖賜書褒之。廣

孝以非淨土真宗。無黨敵之嫌。然當是時。非其宗門者。亦乘

間伺釁。多為寇讎。故廣孝差長子彦二郎於岡崎。輸其無貳。

神祖嘉之。賜名彦二郎曰康重。松榮紀事。康重襲稱豐後守。戶田忠次黨

賊在野寺。○諸書上文竝云。戶田忠次據上宮寺。蓋此神祖時。叛亂無常。出此入彼。自佐崎來野寺也。神祖

遣使諭曰。汝非彼宗門。盍蚤歸順。忠次即放火野寺外郭。而

來岡崎。告神祖曰。臣知野寺之形勢。願發兵擊之。臣請為先

登。神祖使酒井忠次與戶田忠次襲野寺。賊聞之。改修城門。

使我兵錯誤。戶田忠次不之覺。夜抵城門。欲導吾兵。迷不得

入。酒井忠次怒欲歸。戶田忠次更導之。入自後門。攻破第一

柵。進攻第二柵。城兵知戶田忠次之聲。發銃中其首鎧。忠次

仆。酒井忠次引兵而還。戶田忠次亦不至死。神祖褒之。賜短

刀。家忠日記。松榮紀事。松平信一與土呂針崎賊鬪。鳥銃中左股而仆。

敵大訶自誇。信一忽起叱曰。汝何為哉。我豈為汝容易死耶。

敵懼而退。神祖歎其勇敢。藤井松平家譜。鷲峰文集。藤井家紀。功碑。松榮紀事。石川家

成筒井與右衛門。雖為其宗門。不與僧徒。盡忠力戰。故其宗

族亦皆悛志屬麾下。松榮紀事。水野藤十郎忠重。右衛門大夫。忠政第六子。後更

稱總兵衛。與兄信元不睦。避居鷲塚。聞亂起。與水野太郎作

為和泉守。

村越又四郎來岡崎。謁神祖。勵戰功。家忠日記。高力清長采

地高力邑。與土呂相接。賊寇其邑。清長歸擊之。其餘杉浦勝

吉。倉橋宗三郎。青山藤八郎。本多信俊。加藤勘右衛門正次。

渥美太郎兵衛友勝。大岡忠右衛門忠勝。○松榮紀事作忠

稱忠四郎。而忠勝稱忠右衛門。諸士傳略曰。忠勝與佐崎賊

關。斬福王忠右衛門。福王勇兵也。神祖褒之。蓋在此時也。今

據此。訂之。神原忠政。細井喜八郎。勝久等。各有戰功。○據諸士傳

略。勝久喜三郎。勝明第二子。今川氏真將鶴殿長照。長持據參州上鄉城。

松平清善提兵攻之。○松平清善德川歷代作備後守清宗

曰。鶴殿某妻生藤太郎。被出再嫁清善

生清宗。異父同母兄弟。而藤太郎其兄也。家忠日記曰。清善

與藤太郎為異父同母兄弟。按竹谷松平系圖與家忠日記

合。松榮紀事諸士傳迭有勝負。既而清善兵敗。神祖出師援

之。屯名取山。使甲賀諜者襲城。敵兵恇擾。乘虛急攻之。城兵

不能支。長照及弟藤助戰死。城遂陷。神祖戢兵還岡崎。家忠

德川歷代。松榮紀事。○按四年三月。松井忠次擒長照。及

弟藤三郎。而與世子易質。藤助即藤三郎乎。今無所考。是

秋。神祖更名家康。元康今川義元所命。今與氏真絕。故改焉。

三河物語。德川歷代。○按代代記。以更名。為三年。德川記為

四年。三遠平均記。松榮紀事。為五年。春。德川歷代。為五年。冬。

今從年譜。創業記。德十一月二十五日。針崎賊攻上和田堡。

大久保忠勝迎擊之。於小豆阪。○家忠日記。作厚木阪。德川

原木阪。年譜。三河物語。作小豆阪。按厚木小豆賊兵皆舊屬

國音相同。厚字訛作原字。今從年譜。三河物語。賊兵皆舊屬

麾下。精銳之士。神祖將兵援之。阿部忠政射中渡邊守綱之

腰。藤花甚五郎。川田彦十郎。喜藤八大夫。阪部又六。皆中忠

政之矢。渡邊源二郎射忠政。守綱拔矢揮槍。擬大久保與一郎。與一郎退入城中。植村家政與蜂屋半之丞接戰。黑田半平幾危。大久保忠佐出救之。其餘競進。守綱半之丞引去。衆皆格鬪。水野忠重追半之丞。半之丞顧之笑。忠重請決。半之丞提槍而進。其勢甚猛。忠重躲避。半之丞呼曰。雅知汝非吾敵。豈足污吾刃乎。神祖躍馬逼之。半之丞仰見愕眙。俛首收槍而去。松平金助直前詬曰。汝盍反鬪。半之丞揚言曰。吾畏累世主君。豈畏汝乎。揮槍刺殺金助。將取首。神祖大叱之。半之丞恐怖而走。平巖親吉與寬正重接戰。正重射中親吉之耳。將仆。正重進欲擊之。神祖又叱之。正重亦懼而走。二十七

日。大久保忠勝之族屯于伊田邑。攻勝鬘寺之賊。本多正信

弟三彌正重。

○據本多系圖。正重自稱左衛門尉。

與大久保忠世互以鳥銃相

爭。忠世先放。正重傷而退。戰鬪經日不輟。賊徒相與謀曰。戰

于此地。終難得志。宜分兵爲二。一隊與大久保之族戰。一隊

陣于妙國寺。邀上和田之歸路。及敵引去。前後夾擊。則彼陷

泥淖。一夫不得脫。此必破之策也。議既定。蜂屋半之丞大久

保忠俊之女壻也。憫其全軍覆沒。無故盤馬妙國寺邊。往而

復反。忠勝悟其意。引兵還上和田。

年譜。創業記。三河物語。家忠日記。德川記。德川歷代。

松榮紀事。是月。馬場小平太。石川新七郎。矢田作十郎。出上宮寺。

與我兵戰于作岡大平。天野康景擊隊長小平太殺之。敵兵

退走。先是本多廣孝松井忠次攻東條城。數與吉良義諦戰。破之。閏十二月。神祖賞廣孝忠次之功。各增食邑。賜忠次松

平氏。家忠日記
松榮紀事

七年甲子正月三日。神祖築砦佐崎。勦賊。賊燒作岡太平民

屋。燒之。水野信元來自刈屋。賀歲首。○按信元與神祖為舅
甥。始以下神祖與信長構

死。信元移自緒川。居刈屋。四年神祖與信長平。故今來歟。神

祖見煙起。謝信元。馳向佐崎。信元不忍歸去。率麾下兵。至渡

河地。三河物語
松榮紀事神祖欲使上和田兵禦針崎賊。以大久保彌

三郎忠正為鄉導。忠正三郎右衛門忠
久養子。實忠俊子。過盜木。直至小豆阪。

賊歸。自作岡大平。覲面神祖。近藤新一郎放箭。中神祖。神

祖大怒。直衝賊軍。水野忠重斬隊長石川新七郎。水野太郎

作斬青見藤六郎。各獲首級。創業記。家忠日記。松榮紀事。青
見或作大見。國音相通。○松榮

紀事曰。我兵佐馳甚五郎與敵戰死。據家忠日記。德川歷代。甚五郎賊黨也。在上文。紀事誤矣。賊兵波切孫

七郎走至大善阪。神祖親揮槍。搥之二。孫七郎僅脫去。神祖

歛軍還岡崎。家忠日記。係去年十一月。今從年譜。創業記。
松榮紀事。○按德川歷代。係五年誤。說見下。十

一日。土呂針崎野寺賊兵。合為一軍。攻上和田寨。大久保忠

勝之族。堅守拒之。忠勝忠世並被創。創業記。德川記。家忠日
記。松榮紀事。○德川歷

代曰。一說作六年正月。誤。其說是也。然歷代自九月。菅沼定

顯督糧。僧徒作亂。至十一月。小豆阪之戰。皆為五年事。然則

謂。去年一揆之亂。前後涉三年。而六年無戰陣。大久保淨玄所

也。藤井松平亦係五年。蓋承家傳之繆。土屋甚內筒井甚六等

十餘輩。馳戰郭外。城兵乘機出鬪。敵兵披靡。針崎賊見之。出勝鬘寺接戰。神祖聞之。單騎來救。唯宇都與五郎一人從焉。寬重忠內藤信成植村家政等三十八人。相踵而至。敵兵矢炮雨下。吾軍不顧死傷而戰。年譜附尾中根喜藏與渡邊守綱接槍被傷。喜藏捨槍拔刀。與守綱鬪。又傷。鶴殿八郎三郎康定擊傷守綱。○德川記家忠日記松榮紀事年譜附尾八郎三郎皆作十郎三郎德川歷代曰此時十郎三郎既死其子八郎三郎也一說為十郎三郎誤按松平系圖十郎三郎康孝稱鶴殿藏人信孝之弟天文中死信孝奪其邑故岡崎老臣逐信孝歷代之說是也今從之名康定據松平系圖守綱父高綱來救。守綱擊康定殺之。高綱直向神祖而前。內藤正成其甥也。謂儕輩曰。源五左衛門舅也。然今日之事。豈顧私親乎。彎弓射之。矢貫兩

股而仆。守綱負之去。神祖稱正成之忠勇。

○松榮紀事曰內藤四郎左衛門正

成射源五左衛門石川十郎左衛門執槍擬神祖正成又射之正成十郎左衛門之甥也年譜曰內藤正成射渡邊源五左衛門石川十郎左衛門二人殺之十郎左衛門正成之舅也蓋松榮紀事據此文也德川記家忠日記德川歷代年譜附尾皆書內藤甚一郎源五左衛門而無射十郎左衛門事諸書皆云甚一郎源五左衛門之甥也據寬永系圖四郎左衛門正成初稱甚一郎然則一人而非二事今從上諸書定為一事敵兵衝突不止。神祖甚

危。賊兵土屋長吉重治謂其徒曰。吾以為門徒。敵于主君。今

見其危。豈忍乘之乎。墮在地獄。固所欲也。挺身來降。倒鋒戰

死於神祖馬前。神祖義之。日既暮。兩軍引去。神祖卸甲得鉞

丸二。雖中鳥銃。甲堅不能穿。其危至此。神祖使石川家成覓

土屋重治屍。得之。葬上和田。

創業記家忠日記德川記松榮紀事年譜附尾二十五

日深溝九八郎青山虎之助。密啓神祖曰。臣等當入佐崎寺中燒其營。公勒兵攻寺。則必大捷矣。神祖聽之。二人夜潛入寺。賊覺之。擊殺二人。時人以為其志雖壯。無內應者。事故不成。家忠日記松榮紀事年譜附尾二月。酒井正親發西尾城。至櫻井小川野寺。縱火燒聚落。出西野。乞援兵於水野信元。進至八面。攻野寺。賊出若拒戰。正親佯走。敵急追之。正親還戰破之。斬隊長馬場平大夫。驚塚賊邀擊援軍。信元之兵擊破之。乘勝入寺門。斬隊長鈴木彌兵衛。告捷岡崎。上首級。神祖褒正親之功。德川記松榮紀事年譜附尾十三日。神祖使石川又四郎根來十内布施孫左衛門等二十五騎。訶針崎形勢。有告之者。賊伏兵針崎

外郭。及候騎過。伏起邀之。蜂屋半之丞寬正重渡邊守綱等。

督兵疾戰。十内戰死。又四郎孫左衛門被創而退。年譜德川記家忠日

紀事是月。佐崎賊三百餘人。以矢田作十郎為將。侵岡崎。

神祖將兵拒之。命銃卒曰。吾數為賊所窘。皆作十郎之所為也。彼恃拳勇。每為前驅。汝等注目擊之。作十郎果先衆而進。

卒放銃斃之。賊見其死。魂褫氣懾。不能復戰。抱其首而敗走。

年譜創業記德川記松榮紀事自作十郎死。賊徒凶斂日衰。皆悔前非。無復

鬪志。蜂屋半之丞察其幾。就大久保忠正請赦其罪。家忠日記德

川記年譜附尾及松榮紀事一說並云吉田太左衛門雖非門徒為本多正信正重所誘與賊在上呂寺中麾下士齋藤

某其親友也貽書太左衛門勸歸正曰當使本多蜂屋謝罪乞降公必赦之太左衛門然之勸正信正重大久保忠勝以

爲姻戚亦勸蜂屋半之丞使降半之丞從之就忠正請降附以備改忠正與從父兄忠勝抵岡

崎言于神祖曰方今群雄割據天下大亂大并小疆凌弱務

欲辟土地恢疆圉而譜第舊臣不知君臣之義黨比亂賊半

爲寇讐當此時鄰敵乘弊來侵則邦必阽危不如釋其罪戾

使之歸順神祖聽之忠正退而告半之丞即與其黨議又就

忠正請曰儻蒙寬恕則有願三其一赦罪勿沒采邑其二僧

徒住持本寺如故其三赦首惡者勿問神祖聞之曰所請可

允但首惡者不可赦大久保淨玄流涕諫曰忠俊剃髮號淨玄諸書或作常

源臣一門去年以來日日爭戰不惜捐軀或隕命或傷夷公

念其忠義則願降沛宥以易臣之恩賞使歸順之士爲前鋒

攻上野城勦吉良荒川而略西參河之地則疆場日廣而基

業鞏固矣臣雖老僊竊期公以遠大先是水野信元亦請赦

賊徒故神祖從其諫親至上和田淨衆院○德川記作成就院今從三河物語

松榮紀事年譜附尾授印章於僧徒悉釋之遣石川家成於土呂寺諭

衆曰水野下野守懇祈赦宥故一從寬典解釋蕩滌賊徒大

喜皆投干戈而降年譜創業記家忠日記德川記三河物語松榮紀事輒從家成赴針

崎自高須口入勝鬘寺放火小閣賊徒咽煙狼狽家成又諭

之賊皆歸順歡聲如雷○三河物語以下入自高須口及放火爲土呂寺今從德川記年譜附尾但

德川記石川日向守家成作伯耆守誤乃赦松平家次之罪沒松平親光之食

邑親光出奔賊魁鳥居四郎左衛門渡邊義綱渡邊源藏波

切孫七郎。本多正信。及弟正重亡去。後皆被釋。在麾下如故。

德川記家忠日記松榮紀
事德川歷代年譜附尾

神祖欲易土呂針崎佐崎野寺宗

旨。僧徒哀訴。因逐凶惡僧。置有學僧。頒給糧食。檀越大喜。闔

境寧謐。

德川記年
譜附尾

臣按。釋氏之教。絕滅倫理。廢圮君親。然福田利益之說。鼓盪人世。皇朝崇之。講經修法。與朝儀同科。故其徒驕傲多不法。南都北嶺。動至昇神輿。以訴不平。朝廷差兵捍禦之。僧徒狃以爲常。鎧甲爲衣。械刀槊爲經卷。末流之弊。遂至知有佛而不知有君父。知有寺而不知有國。倚蓋淨土真宗。其法簡捷。茹葷啖肉。不異世俗矣。愚夫庸流。易惑其說。

故譜第勲舊之士。黨于破戒亡賴之僧。而忘歷世覆燾之恩。冠屨倒置。緇素同歸。四郊多壘。烽燧告急。悖逆之甚。至此已極。而神祖戎馬之劇。亦未有過于斯時者。設使駿甲二州之敵。乘釁來侵。則疆圉不守。而邦必危矣。幸而良臣獻策。神祖容諫。兇賊革面。叛臣歸順。當時射鈎斬祛之士。皆爲策勲底績之臣。豈非神武大度之效哉。土屋重治去。逆效順。奮不顧身。效死於神祖之馬前。復之六四曰。中行獨復。重治有焉。繇是觀之。天理之存於人心。固不外假。而赴赴武夫。惜爲邪說所汨。而喪其本心也。元龜中。木願寺光佐據大阪城。長島土寇相踵而起。織田信長公攻之不

能克將校多斃。皆由武夫不知有聖人之道。篤信其教。牢不可破。而蹈藉水火。不顧死生。有甚於上之所令者。則釋教之為害。可勝言哉。

神祖將兵攻東條城。城主吉良義諦請降。神祖以其再叛不

許。義諦出奔江州。依佐佐木承禎。六角左京大夫義賢彈正小彌定賴子。剃髮號承禎。

其後戰死于攝州芥川。荒川賴持亦亡去。經歲病死。年譜創業記三

河物語家忠日記。德川記。松榮紀事。○家忠日記曰。六年十月。松平龜千代家忠與松井左近忠次築若幡豆鄉攻東條

城拔之。吉良義諦奔江州。賜東條城於家忠。按東條城陷。義諦出奔。實是在是年二月。蓋家忠出兵攻東條。故去年閏十二

月。神祖褒松井忠次之功。增食邑。賜松平氏拔城賜城。皆諸書所不載。故不取。酒井忠賀失援。出奔

駿府。神祖使水野三左衛門分長守上野城。分長右衛門大夫忠政孫藤二

郎範方子。叙從五位下。任備後守。更彈正忠仕水戶威公。西參河悉平。德川記年譜附尾○松榮紀事曰。三

月。神祖與今川氏真戰。拔長澤城。使本多重次內藤信成守之。按六年正月。使松平伊忠守長澤城。其後不見陷沒。且諸

書所不載。疑有錯誤。故不取。四月。小笠原新九郎安元。丹波守高安子。後稱攝津守。諸書或

作康元。今從小笠原系圖。初謁神祖。請屬麾下。神祖賞之。賜幡豆舊邑。家忠

日記。松榮紀事。五月。今川氏真部將小原資良收將士質。欲略參河。

將士皆屬神祖。不受其指麾。二連木城主戶田主殿助重貞。

彈正少弼康元孫。丹波守某子。松榮紀事重貞作伊忠。蓋以下與松平主殿助同稱誤。今從諸士傳略。築寨三所

而納款。神祖使鶉殿八郎三郎守喜見寺寨。○按八郎三郎

戰死針崎。蓋其子乎。本書名闕。無所取決。小笠原安元守糟塚寨。年譜德川記。重

貞母為質在吉田城。重貞謀欲出之。佯與資良款狎。數入城

雙六重貞家士野野山某。盛殺饌於匱。使擔夫舁至城下。撤蓋示門者曰。主殿助為博賭。設酒食。欲以此時取母汚衣。歸而澣濯。請勿怪。門者諾。重貞與資良博而酣飲。野野山某伺間。納母於匱中。蒙以衣物。門者不之怪。輒得過。重貞騎士迎於中路。護衛而還。重貞告別資良。纔出門。縱火城下。馳歸二連木城。神祖以其有約。出屯御油驛。見煙起。至下地邑。重貞來謁。神祖稱其謀略。增加采邑。資良連攻二連木城。重貞戰死。神祖嘉重貞之忠。以弟甚平為嗣。德川紀事。家忠日記。松榮稱彈正。○按松榮紀事。重貞戰死。其父丹波守致仕。猶存神祖命。丹波守以甚平為嗣。據諸士傳略。丹波守即甚五郎。而奪神祖於潮見阪者也。三年五月二十一日死。故今不取。又按德川歷代以主殿助為丹波守。康長考諸士傳略。康長甚

平之子。以五年生。此時僅三歲。歷代誤矣。神祖發兵攻野田牛窪寨。進逼吉田城。

本多忠勝時年十七。與敵兵牧野宗二郎接槍。是日第一槍。

○牧野宗二郎。松榮紀事作城所助之丞。或云宗二郎。今從年譜家忠日記。三河物語。德川記。蜂屋半之丞。

恥為第二槍。捨槍拔刀。斬敵二人。河井正德放鳥銃斃之。從

者走告其母。母曰。我子怯耶。曰奮勇而死。母曰。死于戰場。固

士之常。若我子怯懦。為人所謗。則雖生不如死。今我無所憾

矣。時人稱之。三河物語。代代記。松榮紀事。戶田吉兵衛氏光。孫右衛門。氏輝子。其

母為質在吉田城。氏光不之顧。而力戰盡忠。松榮紀事。松平清宗

苦戰被創。加藤正次。成瀨正義。犬塚作内。或獲首級。或射殺

敵兵各有功。家忠日記。松榮紀事。然城兵悉力拒鬪。我軍不利而還岡

崎德川記

臣按。戶田氏光左門一西之父也。不顧其母而覬望功名。記者謂之盡忠。夫求忠臣必於孝子之門。果能忠乎哉。上既不能及徐庶。下亦媿戶田重貞多矣。

小原資良築寨於佐脇八幡。使三浦左馬助守之。○按五年九月赤阪

之捷。佐脇八幡皆屬岡崎。蓋其後資良鈔略又得之也。又按德川記。板倉彈正板倉主水與左馬助同守。然彈正主水五

年九月戰死。見上文。故不取。以為吉田牛窪二城之蕃屏。神祖使本多信

俊將兵六百守一宮寨。今川氏真將兵一萬餘以援吉田。分

五千餘圍一宮。自將五千餘屯佐脇八幡。信俊乞援岡崎。神

祖將三千餘兵救一宮。經佐脇八幡二邑間。至本能原。氏真

見其隊伍嚴整。畏縮不敢出兵。神祖直進至一宮。欲與氏真

決戰。敵避其精銳。解圍退于牛窪。信俊出城尾擊。敵兵敗走。

其夜神祖陣于一宮寨。遠州引間城主飯尾豐前。○諸書引間作濱松。

按八年十二月豐前降神祖。其後神祖改引間曰濱松。故今從舊稱。下效之。在氏真營。竊通款於

神祖。稱疾夜歸引間。及過新井白須賀。縱火燒驛舍。氏真大

駭。年譜創業記。家忠日記。德川記。○松榮紀事曰。五年四月。豐前叛。氏真屬神祖。氏真怒。以新野左馬為將攻之。城兵

戰敗。城陷。左馬亦戰死。按豐前以引間叛。實在翊日。神祖反今年。而五年四月之戰。諸書所不載。紀事誤。翊日神祖反

旃。又過氏真之營。其鋒甚銳。氏真竟不能戰。引兵而歸。世謂

之一宮後詰。年譜創業記。三河物語。家忠日記。德川記。德川歷代按。三遠平均記。係十一年誤。○諸書稱是

役曰。一宮退。只今按在氏真則退兵也。在神祖則援軍也。稱謂不當。家忠日記書曰。後詰是也。今從之。六月。神

祖將兵攻吉田城。酒井忠次為前鋒。小原資良雖堅守而孤

立無援。勢日窮蹙。忠次使本多彥八郎忠次助太夫忠俊子議和親。

資良從之。乞質。神祖許之。以異父弟松平康俊及酒井忠次

女為質。忠次女後嫁松平外記伊昌資良大喜。携質還駿府。神祖賜吉田

城於忠次。判東參河事。年譜創業記家忠日記德川記松榮紀事○小原資良即肥前也年譜作

備前。今川氏真使朝比奈肥後據田原城。○按田原城舊戶田氏所據也至主

殿助重貞為二連木城主。神祖使本多廣孝築寨梶邑攻之。未知田原何時屬氏真也。

神祖使本多廣孝築寨梶邑攻之。戶田忠次為敵所圍。幾危。戶田九右衛門勝則馳至。射殺敵

兵以救之。戶田七內光定亦射敵却之。廣孝進戰。攻破外郭。

肥後力屈。致城而去。神祖賞廣孝之功。賜田原城。增加采邑。

○德川記年譜附尾並云。田原城主戶田吉兵衛乞降。致城神祖賜城廣孝。據諸國城主記。田原城明應年中戶田宗光

所築。而子孫世居之。戶田吉兵衛氏光別為一家。先是已屬神祖。且非田原城主。二書誤矣。今從家忠日記。松榮紀事。

是歲。神祖將兵攻御油城。守將本書名闕使善射者乘高雨射。我

兵不得進。神祖命內藤正成射。正成放三箭。其二箭入樓櫓。

鐫內藤四郎左衛門七字于箭。敵還其箭。請又放一箭。神祖

梶之曰。敵必有密謀。汝勿射。正成不從命。出隊將射。敵兵擁

盾路側。將候其進。鏃之。正成放箭穿盾。直洞其甲。殺之。城兵

大駭退走。神祖美其射藝。松榮紀事

八年乙丑春。東參河將士知今川氏真不足。馭眾多屬神祖。

牛窪城主牧野右馬允成定先降。西鄉清真管沼定盈在野

田。白井某在下條。故長條作手段嶺之將士。就此三人相踵

降附。長條作手段嶺謂之山家三方。參河悉平。年譜家忠日記松榮紀事

○松榮紀事曰。設樂某繫妻子。先來來謁岡崎神祖。嘉之。按設樂甚三郎。先是既屬神祖。在上文。故不取。三月。以

本多重次高力清長天野康景為奉行。聽訟決事。世稱參河

三奉行。德川記作七年誤。三遠平均記無本多重次而有重

次彊毅好罵。時人稱鬼作左。清長和煦慈愛。人最易親。稱佛

高力。康景沈重。多謀慮。不輒可否。稱左右無邊。天野三兵。陽

軍鑑松榮紀事。○高力系圖曰。六年一向宗作亂。高力清長還高力邑討賊。亂平。定法制。修補佛像。經卷。故邑人稱曰佛

高力此又一說也。

臣按。鄭子產為政。猛以濟寬。鄭國善治。唐太宗置相。房玄

齡善謀。杜如晦能斷。訖能致貞觀之治。神祖得參河。始置

奉行。剛柔相濟。寬猛兼施。規模之大。可以推而及天下矣。

天野康景幼從神祖往駿府。長而有斬獲之功。剛直明決。

觀於其去興國寺城。可知矣。豈依違兩可。無所操決。如五

代馮道者哉。神祖之用人。蓋有深意焉。

五月十九日。三好左京大夫義繼。修理大夫長松永右衛門

佐久通。彈正忠殺大將軍源義輝於京師室町第。源氏系圖

家譜十二月。今川氏真怒飯尾豐前有貳名。於駿府殺之。豐前

家臣江馬安藝。江馬加賀。固守引間城。屬岡崎。神祖賜豐前

采邑。綏撫之。年譜創業記家忠是歲。賜戶田忠次采地於參

州大津邑。家忠日記神祖帥師攻寺部城野野山藤兵衛元政先

登城主鈴木日向守大敗棄城遁於其采邑家竝與其子監

物奔駿府屬氏真。家忠日記松榮紀事○按寺部城主鈴木

物奔駿府屬氏真。家忠日記松榮紀事○按寺部城主鈴木

也。天文中叛廣忠公降于松平内膳正清定。内膳信定子頻

年黨于浄土真宗之賊又叛神祖然赦其罪不問忠賀兇惡

猶不悛又據上野城叛。○年譜松榮紀事竝云將監去岡崎

賀出奔駿府蓋自駿府潛來據上野也二書疑有誤年譜附

尾必神祖使忠賀棄所置駿府質子之語為此時事益誤

神祖大怒使忠次及本多廣孝攻之内藤信成時十七歲進

逼城門斬敵兵阪部造酒丞今井彦兵衛勝長射殺敵兵頗

多阿部忠政大久保忠勝放矢奮戰城兵皆謂與其與亂臣

永受汚名孰若事寬大之君以圖功名相率而降忠賀力殫

又奔駿府。創業記家忠日記松榮紀事

九年丙寅五月牧野右馬允成定卒其子康成嗣襲稱右馬

允其族出羽守某爭采邑康成訴之於岡崎其辭直神祖賜

書及諱字康成悉授舊邑使水野信元逐出羽守。家忠日記

賜康成書載在古簡雜纂○按是時賜諱十二月二十九日

神祖叙從五位下為參河守。年譜創業記公卿補任家忠日記

是以勅命復德川氏按神祖未嘗改氏或稱松平氏曰復者誤是歲頒給戶田忠次之族兵

右衛門九右衛門與五右衛門等食邑賞其軍功。家忠日記

十年丁卯五月二十七日。織田信長使其宰佐久間信盛送

女於岡崎。妻於世子。年譜創業記信長譜家忠日記松榮紀事是月二連木城主

戶田彈正卒。其子虎千代尚幼。虎千代長而稱孫六任丹波守名康長神祖重

伯父重貞之功。以虎千代為嗣。授松平氏使其舅戶田傳十

郎代統士衆。賜他姓之人松平氏。是為其始。諸士傳略傳十郎虎千代母之

也。弟初小原資良小倉與助皆江州人而事今川義元。資良子

三浦右衛門美姿容。氏真嬖之。右衛門好蹋歌。勸氏真觀之。

氏真遂好之。舉國如狂。氏真奢侈忘武事。信讒喜佞。將士怨

嗟。先是與助子內藏助資久。援武州川越城有功。北條氏康

稱其勇敢。氏真賞之為十八人衆隊長。及飯尾豐前歸順。資

良病不能行。右衛門代將其兵。攻引間城。亦有功。氏真益寵

之。為小番衆隊長。資良在吉田城既久。父子誇其武功。義元

舊臣三浦朝比奈葛山齊藤福島等二十餘人。不能死於桶

峽之難。而逃歸駿府。皆羞之。杜門不出。故新進用事。政柄自

歸於資良父子及資久。舊臣嫉之。多懷攜貳。氏真外祖武田

陸奧守信虎。陸奧守信繩子為其子信玄所逐。在駿府竊與舊臣謀

奪駿府。事露。氏真大怒。逐信虎。信虎奔京師。遣使甲州。使信

玄取駿府。信玄以為岡崎武威日盛。而駿府老將皆怨望。駿

遠二州必為岡崎之有。坐生大敵於肘腋。非計也。乃遣使駿

府。告欲援氏真以攻岡崎。氏真不悅。曰。彼豈援我乎。是欲伐

我也。我豈墮其術中耶。使復命。信玄聞之曰。彼必失國不久矣。與其使他人得之。曷若我自得之。遂與氏真絕。遣山縣三

郎兵衛門昌景於岡崎。通好神祖。定遠州之界曰。大井河以

西屬岡崎。以東至駿河。我領之。神祖許之。家忠日記。三遠平均記。松榮紀事。

十一年戊辰正月十一日。神祖為左京大夫。創業記。公卿補任。家忠日記。松

榮紀。二月八日。左馬頭源義榮。足利左馬頭義維子。義晴公姪。拜征夷大將

軍。足利系圖。將軍家譜。三月大澤左衛門佐基胤部將。基胤治部大尾輔。基相子。

藤主膳。諸士傳略。作彦四郎。蓋初稱也。村山修理。松榮紀事。村山作山村。曰。或作村山。今從年譜附尾。

藤井松平系圖。據遠州堀川城。神祖攻之。松平信一。榊原小平太康

政。七郎右衛門長政子。後任式部大輔。為上野館林城主。為前鋒。康政先登被創。諸士傳略。

大久保新十郎忠鄰。七郎右衛門忠世子。後為相摸守。年甫十六。斬敵得首

級。信一。康政不顧死傷。竭力奮鬪。城遂陷。年譜家忠日記。松榮紀事。神祖

班師。命山本帶刀成行。築見附城。成行相其地形。不宜築城。

故神祖改引間曰濱松。修築城郭。家忠日記。年譜附尾。○林恕。秦湘行記曰。濱松本名

引馬。其東十餘町。有號濱松。處神祖改引馬曰濱松。故彼地

號舊濱松。引馬或作曳間。與引間國音相同。德川歷代曰神

祖諱引間。改稱濱松。按引有引退之義。其或然也。歷是月。神

祖攻宇津山城。守將小原資良。按七年資良去吉田城。還駿府。蓋其後守宇津山城也。

知其難敵。棄城去。瘞消石於城中。及前隊入城。消火暴發。皆

大驚。然無死傷者。年譜。創業記。家忠日記。松榮紀事。四月。遠州二股城主二

股左衛門高藪之淺原某。頭陀寺之松下某等皆來降。○家忠日記。

記松榮紀事頭陀作須田松榮紀事駿州久能城主或作久能

野國音記松榮久野三郎右衛門宗能叛今川氏真屬麾下家忠日

紀八月織田信長欲立源義昭為大將軍義昭萬松院義晴

輝弟事詳京都將軍家譜按鷲峰文集藤井家紀功遣使

碑係十年蓋承家傳之繆也信長譜係十一年為是

江州觀音寺城說佐佐木承禎承禎不從與其子右衛門佐

義弼議守觀音寺城分兵據箕作和田山等城九月信長發

岐阜攻之乞援兵於岡崎神祖使松平信一將兵二千餘援

之淺井軍記松平信一作小笠原與八郎信長別將木下

藤吉郎秀吉其父未詳後稱羽柴筑前守賜姓與信一攻箕

作城城堅不拔信一先登急攻之大呼曰參州援兵松平勘

四郎信一為箕作城之先登聲響遠近將士盡聞之三宅總

右衛門康貞進擊獲首級城兵不能支守將建部善八郎出

走城遂陷信長稱信一之勇敢曰汝可謂膽生毛者矣脫所

著桐紋革胴服授之年譜信長譜家忠日記藤井家紀功碑

吉信一養子安房守也家忠日記藤井松平家譜並曰信

一世以葵為紋神祖同以酢漿草代之自是以桐及酢

漿草為紋承禎義弼出觀音寺城走保甲賀山信長進兵拔十八

城迎義昭入京師信一從行信長下令禁軍士寇鈔信一奴

隸與織田上野介信包之卒信包信長公弟任上野介至從

髮號得故烏帽忿爭將鬪美濃尾張之兵爭環甲操兵圍信

一之旅寓喧噪不可禁信一之兵將放銃矢禦之京師繹騷

信一戒部下。指麾有法。信長聞之大怒曰。我乞援岡崎而信一立大功。汝等若殺參州一人。則我悉族滅汝輩。乃逮尾濃之兵首事者。遣使篤謝信一。贈所齎鳥銃一口。黃金四鎰。事

竣。信一還岡崎。家忠日記。松榮紀事。德川歷代。是月。大將軍義榮病卒。信長

納左馬頭源義昭於京師。十月十八日。義昭拜征夷大將軍。

將軍家譜。十二月。武田信玄將攻駿州。發甲州。神祖為經略遠州。

出屯大井河上。欲以管沼定盈及其臣今泉四郎兵衛延傳

為鄉導。取井伊谷。定盈曰。井伊谷為要害之地。同族二郎右

衛門忠久。近藤石見守康用。周防守忠用子。小字勘介。鈴木三郎大夫重

吉。平左衛門重長子。父子初屬今川義元。○按鈴木家譜。重吉作重時。松榮紀事作重路。今從鈴木重好傳。井伊

谷之豪也。名此三人。頒給采邑。則不戰而得井伊谷。此上策

也。神祖善之。進至井伊谷。賜印章采地及誓書。皆屬麾下。世

謂之井伊谷三人衆。神祖得遠州。其功居多。年譜。家忠日記。松榮紀事。

臣按。有為之主。經略四方者。必資州郡之豪傑。審其形勢。

然後得以拓疆狗地。恢其基業也。漢光武得耿弇以為北

道主人。發漁陽上谷之兵。乃能破王郎。勦赤眉。竟建中興

大業也。織田信長公得美濃三士。以為前驅。稻葉伊豫守。義通氏家常

陸介入道卜全。安東伊賀守。世謂之美濃三人衆。乃能逐齊藤龍興。取膏腴之地。

得以殄滅淺井朝倉。而初建霸業也。神祖得井伊谷三士

以為鄉導。乃能徇遠江之地。據山河之固。得以扼甲斐之

咽喉數與武田信玄爭鋒。卒能斃勝賴而取駿河。立為根本之地也。繇是觀之。戡定禍亂。恢弘基業。必藉豪傑之士。而管沼定盈言聽計從。神祖竟得三士之力。君臣之際。可謂美矣。

信玄入駿州。屯由比側近松野。今川氏真出屯清見寺。以庵原安房為前鋒。據薩埵山將戰。氏真將瀨名朝比奈三浦葛山等。皆通款信玄。拔營歸駿府。安房兵寡不能戰。勸氏真歸駿府城。氏真不知諸將離叛。召議軍事。重臣朝比奈兵衛大夫先遁。其餘悉叛去。氏真不能守城。率二千餘人。寓于土岐山家。入懸川城。依朝比奈泰能。年譜家忠日記代代記至明三速平均記松榮紀事

年春。泰能善存臣節。厚犒士卒。創業記先是氏真使岡部二郎

右衛門正綱。美濃守常慶子守駿府牙城。安部大藏元真守第二城。

○據諸士傳略元真諏訪刑部信真子攝津守信盛祖父也。姓滋野與岡崎元老安倍大藏定吉稱同而人異安部安倍既易混淆世人多以為一人故悉之。信玄以利誘二人。正綱從之。元真不聽。然

勢孤不能守。與其子彌一郎信勝退守安部谷。信玄購伊川

邑民擊元真父子。元真戰敗。僅率妻孥。至濱松降。神祖遣兵

援之。元真再經山路至田代河內二邑。擊土寇却之。神祖褒

之。諸士傳略信玄遣兵燒府城。屯久能山。氏真將二十餘人降信

玄。信玄徵質送甲府。氏真臣三浦與二郎執岡崎之質松平

康俊及酒井忠次女致之信玄。○德川歷代與二郎作與市義高云執二質子抵甲府獻

之信玄按此時信玄屯久能山未歸甲府其說不足憑據今不取信玄大悅幽于甲府進兵

欲取駿州氏真將由比淺原齋藤等並名據伊久見山小原

資良其子三浦右衛門堅守花澤城拒之長谷川二郎右衛

門與其族二十一人據藤枝城故信玄不得輒入駿府右衛

門受氏真之寵義當生死以之在懸川城而以與城主朝比

奈泰能不相善故與氏真訣據花澤城忘公徇私時人譏之

家忠日記
松榮紀事

臣按自古儉邪小人誤人邦家必以奢靡逸樂蠱其君然

後已得行其所欲也三浦右衛門以龍陽之選逞柔曼之

態誇武事以蔑世臣藉君寵以握政柄讒諂壅蔽無所不

至其志不過窮奢極欲而培克漁奪駿遠二州之民朘削

日甚今川氏真晏然以為得良佐彼所好我亦好之彼所

為我亦為之忘父讎而不能報將佐內叛而不能禁舅氏

來侵而不能禦及至流離狼狽遁於懸川城則右衛門以

有私嫌不從其行保花澤城為自全計割袖之恩果安在

哉投畀豺虎豺虎不食百姓報怨褫衣僂辱而舅氏不帝

無渭陽之情為封豕長蛇以肆其吞噬城郭灰燼社稷丘

墟賴神祖包荒之量氏真僅得免死而為寓公儉邪之覆

邦家吁可畏哉

神祖欲攻懸川城中見付驛遣兵攻井伊谷拔之以管治忠

久等為鄉導。進攻刑部城。又拔之。使管沼又左衛門守之。賞

管沼定盈之功。賜書給食邑。家忠日記。松榮紀事。是月。今川氏真攻引

間城。江馬安藝。江馬加賀不能禦。以妻子為質。謝罪降氏真。

加賀密告神祖曰。氏真自戮飯尾豐前。猜疑不輟。急攻引間。

故不得已。乞降以紓一朝之難。非敢懷貳。願亮之。神祖聽之。

加賀告之安藝。安藝以為賣我為己。深憾之。遂招加賀刺殺

之。加賀從士小野田彦右衛門立殺安藝。神祖屯遠州安間

頭陀寺。彦右衛門馳价告之。神祖入引間城賞其功。年譜。創

忠日記。松榮紀事。○德川記。一本德川記抄。德川歷代年譜。附尾竝曰。十年飯尾豐前被殺。其妻守引間城。神祖遣使諭

之曰。致城則當給豐前舊邑。不使家士流寓。妻對曰。妾雖為婦女。生於弓馬之家。致城而去。非其素懷。十二月二十四日。

神祖遣兵攻之。不利。翌日攻破外郭。城兵死者二百餘人。我

兵戰死三百餘人。妻擗甲亂髮。揮眉尖刀。列侍女十七人於

左右。開門而出。縱橫突戰。我兵披靡。妻與侍女皆戰死。神祖

惜之。其事頗偉。按豐前被殺。實在八年。而江馬安藝加賀自

八年至是年。守引間城。蓋豐前妻在城中。遠州高天神城主

不從。安藝加賀之諫力戰而死。附以備考。遠州高天神城主

小笠原與八郎氏興。左京進春儀。子。稱美濃守。馬伏塚城主小笠原美濃

守。○馬伏塚或作真蟲塚。又作蛭蟪。國音轉訛。按小笠原家譜。左京進春儀移自馬伏塚。為高天神城主。而松榮紀事

書美濃守家譜無。美濃守者未詳。觀望氏真信玄兩將成敗。未決。適從神祖

命小笠原安元。及其族大膳亮伊豫守。二人名闕。招諭之。安元往

高天神。氏興欲屬信玄。携質赴甲府。遇諸塗。安元諭使納款。與俱至岡崎。神祖嘉其功。加給采邑。年譜。家忠日記。松榮紀事。信玄將秋

山伯耆晴近。年譜。家忠日記。松榮紀事。晴近。近作信友。而松榮紀事元龜元年以後作晴近。與甲陽軍鑑合。蓋

改名也。今遣使久能城。招久野宗能。宗能不從。晴近怒陣于

平尾村。攻久能城。宗能據鼻關淵拒之。先是神祖使酒井忠

次諭宗能。從懸川之役。故拒晴近之使。晴近乃移營于見付。

神祖使奧平道文監物貞昌子出羽守貞勝菅沼伊豆守滿

直管沼新九郎正員等○松榮紀事正員與之鬪。不利。晴近

乘勝至引間。欲略遠州。乾城主○乾或作犬天野宮内衛門

景貫藤内遠景之裔宮内衛門藤秀子引兵會晴近。神祖遣使責晴近曰。吾

在引間。欲平定遠州。汝何敢為梗。須速引去。不然吾將擊汝。

晴近懼。戢兵歸信州。伊奈久野宗能使其子千菊丸質於岡

崎。歸久能。神祖褒之。賜書授舊邑。別賜食邑於千菊丸。年譜家忠

日記松榮紀事

十二年己巳正月。神祖欲攻懸川城。自將八千餘騎。次吉田。

召諸將諮軍謀。酒井忠次。石川家成。本多廣孝。植村家政。松

平彌左衛門。小栗仁右衛門等為前鋒。酒井正親。松平清宗。

松平家廣。加藤播磨守景元。平巖親吉。戶田因幡守。松井忠

次。○按松井左近忠次六年閏十二月賜松平氏七年以後當書松平忠次。然同時有松平左近真乘諸書似避其嫌。皆書

松井今菅沼定盈等屬之。石川數正。本多忠真。其姪忠勝。天

野康景。高力清長等在麾下。内藤信成。本多重次。渡邊守綱。

神原彌兵衛等為軍監。命康景清長重次。下令三章。禁軍士

剽掠。神祖屯濱松橋輪之法華寺。時武田信玄攻小田原。與

此條氏康父子戰信玄軍于駿府。神祖以山岡半左衛門植村與左衛門為使。使謂信玄曰。今川氏真在懸川城。我拔之不難。然則以大井河為界如前約。卿須取駿州。信玄諾曰。遠州卿須略而有之。豈敢倍約。神祖乃毀見付故城。浚隍崇垣。將逼懸川。氏真之將朝比奈兵衛尉守引間。○按兵衛大夫兵衛尉疑一人。然兵衛大夫前叛氏真出奔。不應復為將。故從本書定為二人。百姓畏岡崎兵。縋負入城。幾三千人。流言參河大兵充塞懸川引間。欲屠人民。故遁至此。兵衛尉大駭。八日棄城走入懸川城。諭百姓迎岡崎兵。神祖聞之。遣石川數正天野康景於引間。灑掃城郭。綏撫百姓。移入引間城。十二日攻懸川城。前軍陣于桑田邑。後軍陣于曾

我山。小笠原氏興久野宗能陣于天王山。渡邊守綱本多重次巡諸軍而合圍。城兵出戰。久野宗能攻金丸山。城兵日根野備中。弟彌二右衛門彌吉等善拒之。宗能敗衄。我兵救之。互多死傷。神祖怒其無功。十七日移營於天王山。松榮紀事二十日。氏真潛遣使於久野八左衛門之營。勸其族約夜來擊我軍。因啗以利。久野宗能弟淡路守宗益佐渡守宗憲叔父彈正忠宗政及采女將監等二人名關皆應之。招宗能勸叛。宗能不從。翌日氏真又遣使刻期約明夜襲營。宗益等議欲殺宗能立功。八左衛門以為宗能吾宗世嫡。委質岡崎。既定君臣之分。殺之不祥。乃執氏真之使。報宗能。宗能抵神祖之營。告狀

神祖以松平與一忠正監物家次子植村家政管沼定盈三宅康

貞為援守久能牙城宗能守羅城遂擊宗益殺之逐宗憲宗

政及采女將監年譜家忠日記德川記松榮紀事二十二日夜神祖策氏真

出兵以大須賀五郎左衛門康高千葉氏之裔父名闕後賜松平氏為遠州橫須賀城

主大久保忠世本多廣孝松井忠次水野忠重為將伏兵於

懸川城門側今川氏真不知久野宗益被殺夜深出兵襲營

伏起邀擊城兵拒戰黎明力屈而退內藤正成小阪新助大

久保忠佐尾擊入城日根野備中兄弟力戰禦之林藤左衛

門加藤孫二郎松下新介小林勝之助重真戰死○按慶長十九年大

阪之役台廟槍奉行有小林勝之助正次蓋重真子或孫也未詳松井忠次之兵左右田與

平岡田竹右衛門石川新兵衛等提槍突戰敵兵多死者備

中從兵伊藤武兵衛先衆而進水野忠重揮槍縱殺之將取

首掠原次右衛門乞其首忠重許之次右衛門以為己功忠

重又擊大谷七十郎殺之大久保忠佐獲近松丹波首家忠日記

松榮紀事○松榮紀事諸士傳略竝曰忠佐又殺敵一人使姪忠鄰取其首忠鄰時十七歲以非己功不肯進擊敵兵獲

首級按十一年堀川之戰忠鄰獲首級見上文此與本多忠勝事叔姪相類疑有傳聞之繆姑附此以待後攷水野

太郎作斬日根野彌吉內藤信成中銃而仆敵欲取其首內

藤家長射敵却之松平近乘松平伊忠內藤正成渡邊守綱

服部半藏正總後稱伊賀守○松榮紀事作正成今訂之挺衆力戰城兵伺間闔

門不出諸將斂軍而退年譜家忠日記松榮紀事二十三日城兵出陣于

天王山。長篠將菅沼左衛門貞景先登戰死。段嶺將菅沼刑部之族信濃守擊敵走之。松榮紀事二月。神祖欲休士馬。引兵歸

見付。使岡崎兵遮守河田村砦。使奥平貞能及菅沼之族守笠町砦。久野宗能守久能砦。小笠原氏興守曾我山砦。家忠日記

松榮紀事神祖欲築城於鎌田原。使山本成行經營之。差役丁。遠州土豪濱名肥前守賴廣。後藤佐渡守氣賀土豪新田友作

等未服從。賴廣家士諫曰。家康為當時名將。濱松皆服。不如速降。點丁供役。賴廣從之。勸佐渡守俱降。佐渡守騎而過營

前。神祖怒使殺之。賴廣懼罪亡去。其族大谷安藝守政賴與弟金大夫賴次據濱名城阻命。神祖遣本多忠勝戶田忠次

視濱名都筑二城。二人復命。二城皆據險要。攻之難輒拔。神祖遣使諭之。二城降。使忠勝忠次戍濱名城。城兵多為其與

力。使本多信俊戍都筑城。佐渡守所據日比澤城兵亦降。忠勝忠次往受之。新田友作失援。棄氣賀出奔。松榮紀事○本

自去年出屯遠州。神祖以定國界。遣使甲府。告其負約。正月八日。信玄書到。答以如約。神祖以為晴近濡滯。則移兵攻之。

晴近恐懼。是月引兵入駿州。據本書。去年十二月。神祖責其違約。晴近引兵歸信州。伊奈蓋十二月。神祖責晴近。遣使甲府。而正月。信玄書到。晴近畏神祖加兵。留於

駿府。而歸伊奈也。本書析為二事。誤。故不書。三月五日。神祖攻懸川城。前軍本多忠勝松平伊忠。與城將朝比奈泰能三浦監物戰。伊忠之兵石原十助向城門射敵中之。敵未離鞍。

放第二矢斃之。城將感其注矢迅速。載矢描金團扇。送于伊

忠之營。七日。大須賀康高。神原康政。戰於西宿。管沼三九郎。斬笠原七郎兵衛。高橋傳七郎。斬朝比奈小三郎。松下加兵衛。斬管沼帶刀。本多正重。斬新谷小介。中山是非之助。斬伊藤左近。高力清長。斬粟飯原平左衛門。各獲首級。林傳四郎。吉勝射殺三騎。安松矢之助。射敵多兵。却之。管沼定盈奮戰。其兵管沼彌太郎。今泉甚助等。與敵接槍。彦阪小作放箭。多斃敵兵。本多康重年甫十六。擊敵殪之。其兵本多左馬助。吉見孫八郎。及奧平貞能之兵。名倉五郎作。揮槍力鬪。松平忠正。管沼藤藏定政。兵部少輔定明子。後改土岐氏。為山城守。各有戰功。城將泰能。監物及笠原出羽守等。拒戰不退。伊藤治部。伊藤掃部等將。

校多死。遂敗走。凡斬城兵一百八十人。加藤市十郎正重以下。我兵死者六十餘人。大久保甚十郎。被重創不能戰。熟視我兵善鬪者。備告主將。人服其勇。諸將乘勝列竹牌。環而攻之。城兵乘船數艘。到懸塚浦。欲邀我軍後。神祖使大須賀康高。神原康政。鳥居元忠。急擊之。斬獲頗多。敵兵走舸遁去。家忠

日記。德川記。德川歷代。松榮紀事。氏真度懸川城。終不可保。遣朝比奈彌太郎。泰勝於石川家。成酒井正親之營。乞和。泰勝右兵衛。泰雄弟。後更稱宗左衛門。子孫事水戶威公。神祖使淺原主殿。謂小倉資久曰。我自幼受義元之扶助。素歸心於氏真。中為讒者構間。遂至交兵。邦人離叛。封疆日蹙。今以遠江全州之地。與我。則與北條氏康協謀。擊

退信玄。使復駿府。不然信玄取遠江。亦如駿府。氏真聞而然

之。乃遣資久於神祖之營。齋誓書定約。懸川形勝之地。糧食

充叔。神祖慮其反覆。築砦數所。使作手將與平貞能。段嶺將

菅沼刑部。長篠將菅沼正員。據金丸山。酒井忠次據河田村。

小笠原氏興據小笠山。○秦湘行記曰。小笠原與八郎居城

小笠山。據之小笠山。即小笠原山也。久野宗能據久能守之。年譜家忠日記。松榮紀事。神祖

將還岡崎。氣賀殘黨又起。土寇相聚。以尾藤主膳村山修理

為將。內山黨。○松榮紀事云。稱給人百姓。及祠官僧徒等磨集。氣賀北吳

石邑有大川。賊鑿隍。湛其水為要害。屯聚一千六百人。謂之

堀川。松榮紀事。○按本書十一年三月。尾藤主膳村山修理

據堀川城。然則堀川之稱。非始于此。蓋本書重復說見

下。賊徒相議。欲邀神祖歸路。神祖不之知。僅十七騎而過。賊

見其兵寡。不以為神祖。及石川數正殿而過。賊始覺之。悔其

不出擊。神祖發岡崎將兵攻之。賊堅守不降。小林權大夫戰

死。地勢險隘。難急攻。自吉美邑取海路。至宇布見邑。陣于濱

松。○松榮紀事曰。陣于山後平松。堀川城枕海。潮盈則賊乘

崎。有古松。今猶存。俗稱御殿松。船出入。潮退則巉巖峭壁。陸路纔一面。是日潮大落。我軍齊

攻。殺賊過其半。森川氏俊有戰功。神原康政先登被創。平井

甚五郎。大久保甚十郎。小林平大夫。重直等。戰死十六人。神

祖命諸將脅從百姓。必不至為大亂。不可屠戮。赦殘黨六七

百人。子孫今在氣賀鄉里。神祖以石川數正。季子半三郎。正

俊鷲猛。為宰治之。寇賊屏息。松榮紀事。本書以正俊為數正弟。今從石川系圖。○年譜家忠

日記。松榮紀事。年譜附尾。並云。十一年三月。攻堀川城。拔之。大久保甚十郎。平井甚五郎。小林平大夫等戰死。創業記。德

川記。德川歷代。並係是年。與松榮紀事合。創業記一說。為去年三月七日事。然則諸書係去年三月者。亦有所從來。而松

榮紀事。戰死三人。及森川氏俊。武功皆疊出。然叙事詳悉。蓋有所據。故去年三月。攻堀川城下。刪戰死人名。而書於此。雖

決非二事。而無所裁。是月。攻大澤基胤所據堀江城。以渡邊定。今並存以俟後考。

圖書監之。松榮紀事曰。圖書山城守茂子。管沼定盈有戰功。近藤康用不被

甲。超隍乘城壁。鈴木重吉戰死。其子平兵衛重好嗣。時年十

二。神祖以其幼。使重吉弟權藏重俊代統其眾。松榮紀事。諸士傳略。重好

後稱石見守。四月。基胤乞降。神祖聽之。給采邑如故。年譜家忠。水戶威公。紀事。今川氏

松榮紀事。名基胤之臣中安兵部權田織部仕麾下。松榮紀事。今川氏

真猶懷狐疑。在懸川城。奧平貞能。其子九八郎信昌。後為美作守。

說小倉資久。齋神祖誓書抵城。氏真意解。五月六日。自懸塚

浦浮舟而去。往相州小田原。代代記作正月二十三日。蓋據

從家忠日記。德川歷代。作若狹守。康信大誤。今從家忠日記。松榮紀事。○雜錄。今川義元戒氏真書略曰。今汝年既長。而不

平家忠護送。至伊豆戶倉而還。家忠紀伊守家廣子。見上文。家廣卒。襲稱紀伊守。德川記

作若狹守。德川歷代。作若狹守。康信大誤。今從家忠日記。松榮紀事。○雜錄。今川義元戒氏真書略曰。今汝年既長。而不

循成人之度。徒愛鬪。鷄走狗。日為兒童之嬉。不學文。不講武。不親將士。不習軍旅。其喪邦覆宗必矣。言甚剴切。周摯至此。其言皆驗矣。攷其年月。則氏真稱朝比奈泰能終始無貳。盡

天文二十二年二月也。氏真稱朝比奈泰能終始無貳。盡忠氏真。以為人臣之法。善遇之。創業二十二年。神祖賜懸川

城于石川家。成守之。先是神祖中分參河將士為二。以酒井

且責

三三

忠次石川家成爲旗頭。西參河諸將松平左近真乘。和泉守親乘子。

松平三藏島田平藏松平信一。松平宮内酒井正親内藤金

一郎。松榮紀事作喜一郎按内藤家譜彌次右衛門平巖家長初稱金一郎諸書作喜一郎誤今據此訂之。

親吉鈴木喜三郎小原越中守等屬家成東參河諸將松平

親次松平内膳。松榮紀事本書名闕。○按與一郎忠正子家廣稱内膳是時尚幼其餘無稱内膳者未詳。

松平源七郎康直。上野介康忠子世稱長澤家後襲稱上野介。松平又八郎。○按

伊忠家忠父子並稱又八郎未知爲誰。松平清宗松平家忠松平彌九郎景忠。

外記忠次子。設樂甚三郎菅沼定盈西鄉新太郎松平丹波。○按

系圖此時無稱丹波者戶田虎千代賜松平氏在上文長而任丹波守蓋追書之也。奧平貞能牧野新

二郎。○新二郎成定九年卒在上文蓋其子右馬允康成亦襲稱新二郎此書其初稱也。鶴殿八郎三

郎等屬忠次。○按鶴殿八郎三郎康定七年戰及賜懸川城死于勝鬘寺蓋其子也今無所考。

于家成命旗頭職於其姪數正。○松榮紀事姪作兄誤今訂之。而家成及大

久保忠世大須賀康高松井忠次不屬兩旗常爲遊軍本多

廣孝本多忠勝鳥居元忠榊原康政護衛麾下。松榮紀事神祖既

得遠江是月率五六百騎按行郡縣武田信玄將山縣昌景

在駿府帥三千餘騎過金谷路遇神祖下馬拜謁見神祖兵

寡心動託事忿言欲急襲之神祖覺之退兵可五六町據險

隘拒之斬前進者七八騎昌景知不可敵引去時人謂信玄

爲與國之交未幾倍約曲在昌景信玄聞之憚世人譏議謹

責昌景將佐請原宥乃釋之。年譜創業記家忠日記德川記松榮紀事由是神祖

與信玄絕聞甲州之兵窺懸川城使松平清宗援石川家成

清宗家成之女婿也故命之清宗守西阪鹽井原之砦扼其

要路有戰功○西阪或作新阪日神祖褒之賜遠州三邑北

條氏康屯薩埵山日與信玄挑戰神祖乘其虛發兵駿府攻

城山縣昌景不能守棄城走○按去年十二月信玄燒府城

昌景守信玄以為前有小田原之兵後有岡崎之軍前後受

敵進退必危引兵還甲府氏康亦使諸將守蒲原大宮新田

善德寺興國寺中窪韭山新條深澤山中等十餘城還小田

原神祖與氏康議納氏真於駿府然城郭灰燼無地稅駕故

氏真在戶倉城使岡部正綱及弟治部右衛門修築府城家忠

日記松榮紀事六月神祖發兵攻遠州天方城神原康政為前鋒攻

破郭門進入第二城天野康景擊敵被創大久保忠鄰力戰

有功城主山内山城乞降神祖聽之進攻飯田城拔之斬守

將山内大和年譜創業記家忠八月賞久野宗能之功賜嚮

所沒反黨宗族之舊邑武田信玄憤山縣昌景敗於駿府欲

再得之九月信玄大發兵先攻小田原城神祖使松平真乘

援懸川城十月信玄收兵還甲府與氏康兵戰於相州三增

敗之攻駿河伊豆數城拔之氏康諸將聞信玄寇相州各棄

所守城寨歸小田原欲拒之獨北條新三郎氏時新九郎長

子守蒲原城不去十一月信玄又發甲府徇駿豆之地軍聲

大振。十二月。欲攻駿府城。過蒲原城。氏時與之戰。敗死。信玄進攻駿府城。岡部正綱堅守不下。信玄啗以重利。誘之。正綱信之而降。信玄又取府城。分兵據榛原郡小山城。神祖率兵攻之。賞松平真乘戰功。賜隸小山八邑。吉永西島幸玉藤窪山川舟市山梨二千貫地。家忠日記、松榮紀事、諸士傳略先是松平康俊拘幽甲府。是月。以伊賀謀伴勝永計。大風雪夜。醉飽守者。伺其怠。冒險逃歸岡崎。踏雪覈痕。足指皆墮。家忠日記、松榮紀事、德川歷代、並無年月、年譜附尾、係年月、蓋信玄出陣、駿河、乘其間而逃歸也、今從之。

松井甲太郎書

烈祖成績卷之二終

刻者列名

神田鍛冶町四番地	江川八左衛門 <small>二枚</small>
橘町二丁目十番地	江川鉄次郎 <small>一枚</small>
濱町二丁目三番地	江川直三郎 <small>一枚</small>
麴町十三丁目十番地	瀧澤叢吉 <small>八枚</small>
四谷舟町五十七番地	牧野丈三郎 <small>一枚</small>
木挽町三丁目十五番地	竹口茂兵衛 <small>二枚</small>
日影町二丁目一番地	竹口久次郎 <small>一枚</small>
本郷元町二丁目四十番地	竹口金次郎 <small>一枚</small>
濱町二丁目一番地	松島政吉 <small>一枚</small>

神田旅籠町丁目千三番地

竹口瀧三郎 一枚

同

竹口瀧三郎習中弟子

竹口勝造 一枚

同

同

竹口安太郎 一枚

同

同

竹口久次 一枚

神田小柳町十三番地

木邨嘉平 八枚

吳服町十番地

宮田六左衛門 三枚

八官町四番地

五氏括

杉田金助 一枚

127
10
125

Handwritten text on the right edge of the right page.

